



宋史新編

四 北京列傳

第二十六



內閣文庫		
番號	漢	8829
冊數	65	(27)
函號	286	78





宋史新編目錄合卷二十六

列傳十八

劇可久

趙逢

蘇曉

高防

馮瓚

邊珣

王明

許仲宣

楊克讓

段思恭

侯陟

李符

魏丕

董樞

馬令琮

杜漢徽

張廷翰

吳虔裕

蔡審廷

周廣

張勳

石曦

張藏英

陸萬友

淺草文庫

解暉

李韜

王晉卿

郭廷謂

子延濬從子延澤

趙延進

輔超

卷七十七

列傳十九

楊業

子延昭等王貴附

荆罕儒

從孫嗣

曹光實

從子克明

張暉

司超

李進卿

子延渥

楊美

何繼筠

子承矩

李漢超

子守恩

郭進

牛思進附

李謙溥

子允正

姚內斌

董遵誨

賀惟忠

馬仁瑀

卷七十八

列傳二十

王贊

張保續

盧懷忠

王繼勳

侯贊

翟守素

王文寶劉審瓊

趙玘丁德裕張延通梁迥史珪田欽祚王侁附

劉福

安守忠

孔守正

譚延美

元達

郭密傅思讓李斌附

常思德

尹繼倫

薛超

丁罕趙瑤附

田仁朗

劉謙

卷七十九

列傳二十一

劉保勳

滕中正

劉蟠

孔承恭

宋璫

袁廓

樊知古

郭載附

臧丙

徐休復

王延範附

姚坦

陳從信

張平

子從吉

王繼升 子昭遠 尹憲

王賓

安忠 張鑑

張觀

索湘 宋太初

盧之翰

鄭文寶 王子興

劉綜

卞袞 許驥

裴莊

牛冕 張適附 樂崇吉

袁逢吉

韓國華 何蒙

慎知禮 子從吉

宋史新編卷七十六

列傳十八

明南京戶部主事莆田柯維騏編

劇可久 趙逢 蘇曉 高防

馮瓚 邊翊 王明 許仲宣

楊克讓 段思恭 侯陟 李符

魏丕 董樞

劇可久字尚賢范陽人沉毅方正明律令與馮道趙鳳為友後唐同光初以鳳薦歷著作郎仕晉歷大理卿周初改太僕卿分司西京坐失舉停任復起為右庶子世宗以刑書深古條目繁細難於檢討又前後敕格重互

亦難詳審於是中書門下奏曰伏以刑法者御人之銜
勸救弊之斧斤將救舞文之弊宜伸畫一之規命張湜
劇可父等十人編集從之書成凡三十卷目曰刑統可
父復拜大理卿建隆三年告老改光祿卿致仕卒年七
十七可父在廷尉四十年用法平允以仁恕稱

趙逢字常夫媯州人漢舉進士甲科解褐授祕書郎直
史館周歷水部郎中掌誥命宋初拜中書舍人坐事貶
乾德初召授都官郎中知制誥二年判昭文館未幾充
樞密直學士加左諫議大夫蜀平出知閬州代還遷給
事中充職太祖征太原以逢為隨軍轉運使鑄印賜之

數年卒逢性剛直有吏幹揚歷清近所至有聲然傷慘
酷又言多詆訐縉紳目為鐵槩

蘇曉字表東武功人漢祖鎮太原表為觀察支使周廣
順初為大理正以讞獄有功遷少卿顯德中歷屯田郎
中宋初詔同詳定刑統既而權大理少卿事累擢右諫
議大夫判大理寺賜金紫轉左諫議大夫卒曉深文少
恩號為酷吏

高防字脩已并州人性沉厚守禮法累世將家父從慶
與梁軍戰死防年十六護柩以歸事母孝好學善為詩
初張從恩移澶州防禦使表為判官有親校段洪進盜

宋史新編卷之七十六
官木造器市取其直從恩將殺之洪進曰判官使爲之
防卽引伏洪進得免後從恩知其自誣以活入益加禮
重隨從恩歷鄆晉潞三鎮判官契丹入汴從恩欲歸款
防爲陳逆順不聽歸契丹命副使趙行遷知留後從恩
所親王守恩爲巡檢與防同領郡事防與守恩謀誅行
遷以城歸漢祖加檢校金部郎中乾祐初授屯田員外
郎改浚儀令未幾免職周祖卽位復起再遷刑部郎中
讞獄無遁情後歷知諸州遷至戶部侍郎咸有勞績太
祖征李筠防爲潞州東北路計度轉運使澤潞平拜尚
書左丞建隆二年出知秦州州產大木夏人利之防議

建採造務築堡要地以渭爲界夏人涉渭奪木筏殺役
兵防出與戰俘四十七人以獻太祖慮擾邊詔諭酋帥
賜所獲俘錦袍銀帶遣之遂罷採木之役命吳廷祚爲
節度代防歸爲樞密直學士復出知鳳翔卒年五十九
帝以素尚清白詔厚賻焉

馮瓚字禮臣歷城人性便佞任數務巧進以蔭歷仕晉
漢周至祠部郎中充集賢院直學士太祖甚寵之擢至
左諫議大夫出知舒州境內有菰蒲魚鱉之饒居民採
以自給瓚奏蠲其稅徙知廬州乾德三年以本官充樞
密直學士時劔外初平命瓚知梓州無何蜀軍校上官

進率亡命三千餘人掠民數萬夜攻州城瓚曰賊乘夜
奄至此烏合之衆以箠挺相擊必無固志正可持重以
鎮之且自潰矣密令促其更籌五鼓賊悉遁去因縱兵
追之擒上官進斬於市初大祖欲任用瓚常與趙普言
瓚有奇才普忌之乃遣詣蜀平寇潛令所親信從其行
密察其過卽亡入京師擊登聞鼓訟瓚受賕爲姦事太
祖欲貸其死普固執不可乃削籍流登州沙門島瓚在
海上凡十年不得召開寶末赦還太宗起歷度支判官
遷至祕書少監又改大理卿兼判祕書省以足疾求解
除給事中致仕復舊勳階卒

邊珣字待價華州鄭人晉天福六年第進士歷仕漢周
至職方員外郎知通州課鬻鹽於狼山歲增萬餘石宋
初兄珣自河南令入爲吏部員外郎復以珣爲洛陽令
兄弟迭尹赤邑時人榮之開寶初遷職方郎中監京兆
麴務又掌永安軍權貨奏徙務揚州就命權知州事會
征江表兼領淮南轉運使金陵平知江北諸州轉運事
太宗遷吏部郎中召還賜金紫充廣南轉運使代歸拜
右諫議大夫後知開封府卒

王明字如誨大名人晉舉進士不第樂元福爲原州刺
史辟爲從事馮暉節制靈武表爲觀察巡官周廣順初

元福領陳州防禦使奏署判官會劉崇寇晉州命元福將兵援之事多咨於明先是州縣吏部送丁壯餉糧一夕夫盡遁去元福怒盡驅官吏出軍門將就戮明馳往白元福曰今軍儲無闕不如寬以待之賊敗凱旋公無專殺之名不亦善乎盡免其死既而崇衆宵遁即命元福爲建雄軍節度留鎮因奏署明爲書記賜緋魚顯德初元福移鎮陝恃功驕恣明以直道見疎因謝絕之詣闕上書求任州縣歷清平郟城二縣令宋初歷遷右補闕會用兵嶺南選爲荆湖轉運使開寶三年大舉南征爲隨軍轉運使既而賀州未下明入與主帥計當急取

之因抵廣州賊衆十餘萬拒戰明與都部署潘美等謀逆擊斬首數萬廣州平爲本道轉運使擢授祕書少監領韶州刺史充轉運使俄以潘美尹崇珂爲嶺南轉運使以明爲副使無名科斂悉條奏除之嶺表遂安代歸帝召見勞問是歲將用師南唐以明爲黃州刺史帝密授成筭俄而王師乘戰艦而下即以明爲江路巡檢戰擢都部署擊鄂州軍於江南時南唐將朱令贇自上江領衆十五萬將焚采石浮梁抵金陵爲援明遣其子馳奏請添造戰艦襲令贇帝曰非應急策也密遣人諭明令樹長木於洲浦間若帆檣狀令贇望見果疑大軍襲

其後逗撓不敢進明與諸軍合勢大破之擒令贊金陵平詔明安撫諸郡因命知洪州太宗卽位累遷禮部侍郎會契丹擾邊以明知真定府契丹遁去淳化初召還知京朝官差遣事卒子挺扶竝進士及第歷臺省皆知名

許仲宣字希榮青州人漢乾祐中登進士第時年十八周歷淄州團練判官末初赴召引對便殿太祖悅其氣貌雄偉擢授太子中允受詔知北海軍仲宣度其山川形勢地理廣袤可以爲州郡因畫圖上之遂升爲維州從征并門掌給納四十餘州資糧悉能集事南唐平以

漕輓功拜刑部郎中太宗累遷給事中卒仲宣性寬恕倜儻不檢有心計初爲濟陰主簿時令與簿分掌縣印令畜嬖妾與其室爭寵令弗能禁嬖欲陷其主竊取其印藏之封識如故以授仲宣翌日發匣無其印因逮捕縣吏數輩及令簿家人下獄鞫問果得之於令舍竈突中令聞之倉皇失措仲宣處之晏然人服其量嘗從征江南都部署曹彬令取陶器數萬給士卒爲燈具仲宣已預料置奉之如其數其才幹類此

楊克讓字慶孫馮翊人晉末舉進士不第州將劉繼勳辟爲戶曹掾歷漢周遷至延州觀察推官累加朝散大

夫兼殿中侍御史連以家難去職太祖起爲左補闕乾德六年知果州開寶三年爲西川轉運副使蜀民懷其善政重書褒美代歸闕下疏民利病十事稱旨太祖召升殿賜坐勞問面賜金紫將大用爲侯陟所沮事見陟傳歷知廣州兼轉運市舶使卒克讓少好學歷官廉謹幹局所至有聲子希閔字無間生而失明令諸弟讀經史一歷耳輒不能忘屬文善緘尺趙普守西洛府中牋疏皆希閔所爲將奏署本府掾固辭不受早卒有集二十卷自教三子日華日嚴日休皆登進士第希閔弟希甫從子日宣亦登進士第

段思恭晉城人在晉以父蔭登仕歷漢周至左司員外郎宋初除開封令遷金部郎中蜀平通判眉州時亡命集衆攻通州城思恭募軍士先登者厚賞於是諸軍賈勇大敗賊思恭矯詔以上供錢帛給之度支請按其罪太祖憐其果幹不許令知州事丁母憂起復俄召爲考功郎中知泗州會馮繼業自靈州舉宗來朝以思恭代知州事至則悉矯繼業之失綏撫夷落訪求民病奏免之遷右諫議大夫知揚州朝廷方經略江表命兼沿江巡檢與通判李岩相告訐降秩知宿州太宗卽位遷將作監知秦州又坐不法爲通判王延範所發降秩知邢

州後知壽州累遷給事中尋知陝州卒思恭不知書無學術然踐更吏事所至亦著勤績云世宗時侯陟淄州人漢末舉明經周歷襄邑令建隆初爲宛句令以清幹聞就遷左拾遺節度袁彥頗爲不法陟抗章言之歷左司員外郎權判吏部銓出知揚州會出師收金陵陟以所部敗南唐軍於宣化城俄爲部下所訟乃求哀盧多遜多遜素與善爲畫計時江表未拔太祖議休兵以爲後圖陟適從揚州來知金陵危甚令上急變求見大言曰南唐平在朝夕陛下奈何欲班師願急取之遂寢前議竝赦陟罪復知吏部選事太平興國中累

遷左諫議大夫權御史中丞事初趙普在中書陟嘗上疏言其短至是普再入相陟頗憂恚加給事中同判三司卒贈工部尚書陟有吏幹性狡獪好進善事權貴巧中傷人太祖問識楊克讓否對曰臣與克讓甚善知其才識朝廷佳士也近聞其自言上許以大用多市白金作飲器以自奉臣頗恠之上怒亟出克讓典郡焉李符字德昌大名人漢歷大理正乾德中知歸州轉運司制置歸朝以京西諸州錢帛不登選知京西南面轉運事奏便宜百餘條凡四十八事命著爲令因奏對稱旨遷起居郎太祖欲遣符京有事于南郊符上書陳八

難不從改比部員外郎部太平興國中連遷祠部郎中知廣州兼轉運使在任有善政民為立生祠召為右諫議大夫歷知開封府趙普令符上言廷美在西洛非便遂有房陵之貶普恐泄以事貶符寧國軍行軍司馬盧多遜貶崖州也符白普春州瘴毒盡徙處之普不答及符貶德超屢稱其冤會德超以事貶帝惡其朋黨徙符嶺表普移符知春州歲餘卒符無文學有吏幹好希人主意以干進終以此敗

魏丕字齊物相州人頗涉學問周世宗鎮澶淵辟司法參軍有盜五人獄具不疑其冤緩之不數日果獲真盜

歷三縣令世宗即位累遷供備庫副使太祖即位改作坊副使時楊承信帥河中或言其反側未安命丕賜承信生辰禮物陰察之還言其無狀以久次轉正使領代州刺史凡典工作十餘年討澤潞維揚下荆廣收州峽征河東平江南太祖皆先期諭旨令脩勑器械無不精辦太宗累遷黃州刺史還朝作歌以獻因自述願授臺省之職上面諭曰知卿本儒生然清望官奉給不若刺史之優也遷至左驍衛大將軍卒年八十一

董樞真定人後唐以獻書得官歷晉周至殿中侍御史乾德初遷主客員外郎書請伐蜀蜀平通判劍州遷

北部郎中三年出兼桂陽監使上書請伐廣南詔益桂陽戍卒三千令樞統領開寶二年又上方略會劉錡遣內侍曾居實侵桂陽監樞擊退三年大舉伐錡令樞率兵趨連口克之改兵部郎中權知連州兼行營招撫使嶺南平賜錢三百萬四年移知襄州又爲河北轉運使改判西京留司御史臺初樞罷桂陽監左贊善大夫孔璘太子洗馬趙瑜相繼代之及瑜歲滿代者著作郎張侃奏瑜在任累月得羨銀數千斤計樞與璘隱沒可知詔下御史獄當死太祖曰趙瑜非自盜但不能發摘耳樞璘竝坐死瑜決杖流海島擢侃屯田員外郎

論曰人臣近君者列卿侍從近民者監司守倅苟咸得人天下何憂弗治太祖更制內外迭出入尤慎遴選若劇可久用法仁恕高防著勞澤潞馮瓚兵略邊羽郡績王明戰功許仲宣心計楊克讓幹局段思恭便宜平寇難魏丕工作濟戎事當大業開創撥亂反正之初諸人者一切彰彰有政迹或未免少疵固弗論况曩行可稱者哉趙逢蘇曉慘酷少恩如治體何侯陟嫉賢巧中傷與鬼蜮何異李符希旨深文竟投荒自弊爲天下笑董樞貪冒不克令終彼皆嘗效知謀所至治辨乃小人之才云

馬令琮

杜漢徽

張廷翰

吳虔裕

蔡審廷

周廣

張勳

石曦

張藏英

陸萬友

解暉

李韜

王晉卿

郭廷謂子延春從子延澤

趙延進

輔超

馬令琮本名令威避周祖名改之大名人父全節五代史有傳令琮少善騎射嘗從其父平安州及與鎮州安重榮戰皆有功歷仕晉漢周至虎捷左第一軍都指揮使兼領建州刺史太祖卽位出刺懷州帝將親征李筠

令琮日夜儲蓄以俟王師太祖善之授團練使又充先

鋒都指揮使澤潞平爲昭義兵馬鈐轄卒

杜漢徽京兆人有膂力善騎射後唐累遷護聖軍使歷

晉漢周遷至本軍左第四軍都虞候宋初補本軍都校

領潮州刺史從平李筠及李重進錄功居多建隆三年

出爲天長軍使移雄武軍使知屯田事是冬被病請告

歸京家人勸其求醫藥漢徽笑曰我在戎行四十年大

小百餘戰不死幸矣安用藥爲未幾卒

張廷翰冀州人少慷慨有智略善騎射晉時爲牢城軍

校遭契丹之變州人共推廷翰知州事漢初就拜刺史

宋史新編卷七十一
十一
周歷隸海沂三州團練使屢率兵敗淮人移萊州宋初
又歷冀亳二州卒

吳虔裕許州人少爲郡吏漢歷宣徽北院使周歷右衛
左金吾衛二大將軍兼街仗使太平興國六年遷右千
牛衛上將軍仍判左街仗事掌金吾三十餘年卒年八
十八贈太尉虔裕性簡率言多輕肆右金吾上將軍王
彥超告老虔裕語人曰我縱僵仆殿階下斷不學王彥
超七十致仕人傳笑之

蔡審廷磁州人少能騎射晉應募補護聖散都頭周累
擢副指揮使宋初授殿前散都頭指揮使從征李筠攻

澤州先登爲飛石傷足賜賚甚厚歷鎮州兵馬都鈐轄
卒

周廣字大均應州人父密事晉爲節度使周至太子太
師致仕廣幼從其父爲牙校歷漢周至眉州刺史宋授
隰州刺史遷潘州團練使從征太原還加秩後改右屯
衛大將軍領郡如故卒

張勳洛陽人晉景延廣表爲供奉官周歷霸州兵馬都
監宋初征李筠破澤州皆預有功命權知許州荆湖平
以功就拜衡州刺史後克郴州及桂陽監以勳爲刺史
兼監使卒勳性殘忍每攻破城邑頗有橫羅鋒刃者將

赴衡州州民涕泣相謂曰吾輩何以安乎
石曦太原人晉祖弟韓王暉之子天福中爲右神武將
軍歷漢周爲左衛將軍建隆中遷左驍衛大將軍護秦
州屯兵西人犯邊曦率所領擊破之太祖征晉曦領兵
自澤潞除道至太原壅汾水灌其城又益兵部攻遼州
俄知雄州代爲潭州鈴轄開寶八年領兵敗南唐軍平
諸洞蠻寇太宗累遷右龍武軍大將軍卒
張藏英范陽人唐末舉族爲賊孫居道所害藏英年十
七僅以身免後逢居道函州市引佩刀刺之不死爲吏
所執節帥趙德鈞壯之釋不問以補牙職居道避地關

南藏英求爲關南都巡檢使至則微服攜鐵槌匿居道
舍側伺擊仆於地齧其耳噉之遂禽歸設父母位陳酒
肴縛居道於前號泣鞭之齧其肉經三日刳其心以祭
卽詣官首服官爲上請而釋之燕薊間目爲報讎張孝
子仕契丹旣而歸周歷濮州刺史領邊任屢敗契丹兵
征瓦橋關爲先鋒都指揮使又改關南排陣使宋初遷
瀛州團練使弁護關南軍卒孫鑑自有傳

陸萬友靈丘人少隸太原爲裨校漢歷天雄軍馬軍都
指揮使周祖之起兵也萬友預謀及踐阼擢至安州防
禦使宋遷至右監門衛大將軍充河陰兵馬都監卒萬

友始業巧鑊既貴達不忘本以銀爲巧鑊器數十事示
子孫性猛暴以武勇自任所至無善政太宗以勳舊恩
遇不替爲許王聘其次女

解暉臨洛人後唐時父珪從軍沒於陣暉得隸兵籍以
功遷奉國軍隊長歷晉周遷至虎捷第一軍都虞候宋
初爲步軍都軍頭澤州策勳爲內外馬步軍副都軍頭
乾德元年充湖廣道行營前軍戰擢都指揮使潭州平
璽書獎諭僞統軍黃從志據岳州暉討平之生禽從志
改控鶴右第二軍都指揮使領高州刺史後又破太原
軍改均州刺史太平興國初爲威勝軍使從征并州禽

招討使李詢等六人復分攻太原以功遷本州團練使
知霸州雍熙初充雲應寰朔忻代等州都巡檢使三年
代歸本郡淳化二年被病告老改右千牛衛上將軍致
仕詔未至卒年八十暉鷲猛木強每受詔征伐常身先
之由是頗立戰功金創徧體時稱驍將

李韜河朔人爲禁軍隊長周祖征三叛韜從白文珂攻
河中兵傳其城文珂夜詣周祖議犒軍留韜城下時營
柵未備李守貞乘虛來襲營中惶怖失據韜援稍而進
死士十餘輩隨韜犯賊鋒有猛將躍馬持戈擬韜韜刺
之洞胷而墜又連殺數十人大破之韜由此知名累遷

軍校出爲趙州刺史移慈州開寶元年卒
王晉卿河朔人初以藝勇隸周世宗帳下及卽位補供奉官累立戰功歷擢龍捷右第一軍都指揮使領彭州刺史恭帝卽位出爲濱州刺史乾德中自興州移漢州時蜀初平寇盜充斥晉卿設方略盡禽之自是雖劇賊無敢窺其境然以賄聞太祖惜其才置不問歷莫州刺史士卒樂爲用邊民安堵

郭廷謂字信臣彭城人父全義仕南唐爲濠州觀察使廷謂幼好學工書善騎射補濠州中軍使李景每令偵中朝機事入奏擢莊宅使濠州監軍屢敗周師遷至滁

州刺史上淮巡檢應援兵馬都監及紫金山之戰諸將多歸降者獨廷謂以全軍還守濠州俄加本州團練使是秋周師復至表于景請援兵不至降于周世宗特加宴勞拜亳州防禦使命攻天長軍降其將馬贇又爲樓櫓戰擢左右廂都監俄歸譙郡宋初從征上黨再知亳州歷靜江軍節度觀察留後卒年五十四廷謂性恭謹事母以孝聞未嘗不束帶立侍子延濬兄子延澤延濬字利川初爲桂州牙內都指揮使父卒太祖錄爲供奉官太宗歷改崇儀使李順亂又改西京作坊使充成都十州都巡檢使合王繼恩兵破賊斬首千餘級繼

宋史新編卷七十一
恩又請延濬知漢州錄功改洛苑使又命率兵屯遂州
劔門鈐轄轉運使上其勞詔書嘉獎真宗初改內園使
代還會河朔用兵延濬馳往邊城按視砦壘以疾卒
延濬字德潤南唐試祕書省正字宋初歷殿中丞知建
州太宗聞延濬洎董元亨皆好學詔宰相召問經史皆
條對稱旨命爲史館檢討歷國子博士咸平中求休退
授虞部員外郎致仕居濠州城南有小園以自娛其詠
牡丹千餘首聚圖籍萬餘卷元亨亦至虞部員外郎嘗
續玄門碑誌三十卷

趙延進頓丘人父暉周太子太師延進右千牛衛將軍

濠州兵馬鈐轄從征瓦橋關爲隨駕金吾街仗使宋初
歷管權判右金吾街仗使歷知河中府梓相青三州太
平興國中累功遷右監門衛大將軍知鎮州及代吏民
數千守關借留詔許留一年歷右驍衛大將軍改知鄆
州淳化初飛蝗不入境詔褒之至右金吾衛大將軍卒
年七十三贈左武衛上將軍延進涉獵經史好作詩什
妻卽淑德皇后之妹子昂登進士策

輔超秀容人晉隸澶州軍籍漢以功補小校顯德中以
功轉日騎副兵馬使宋初從平上黨再遷內直都知太
宗以爲馬軍都軍頭會親征太原冒矢石攀堞先登身

被十三創帝嘉其勇賜袍帶詰朝再乘城中流矢者八
復厚賜歷加都軍頭領澄州刺史真宗連拜萊州團練
使以年老願留京師從之卒年七十七
論曰語有之千金之裘非一狐之腋方太祖初得天下
所資經營鎮撫之臣何可勝數哉馬令琮輩或典金吾
或鎮方州或從征討雖操行靡二而勞績則均令琮儲
蓄迎王師解暉陷堅禽敵將趙延進歷數州多異政其
忠其勇其惠尤足稱者郭廷謂孝而加恪張藏英為親
復讎斯又有裨於俗獨為國爪牙已乎

宋史新編卷七十六

宋史新編卷七十七

明南京戶部主事莆田柯維騏編

楊業

子延昭等
王貴附

荆罕儒

從孫嗣

曹光實

從子克

張暉

司超

楊業太原人父信為漢麟州刺史業弱冠事劉崇以驍
勇聞遷至建雄軍節度使屢立戰功國人號為無敵太
宗征太原孤壘甚危業勸其主繼元降以保生聚帝召
見業大喜以為右領軍衛大將軍師還授鄭州刺史帝
以業老於邊事復遷代州兼三交駐泊兵馬都部署擊
敗契丹以功遷雲州觀察使仍判鄭州代州雍熙三年

大兵北征以潘美爲都部署命業副之而以刺史王侁
團練使劉文裕護其軍諸軍連拔雲應寰朔四州會曹
彬之師不利諸路班師美等歸代州未幾詔遷四州之
民於內地令美等以所部之兵護之時契丹國母蕭氏
與其大臣耶律領衆十餘萬復陷寰州業謂美等曰今
敵兵益盛不可與戰侁沮其議曰但趨鴈門北川中鼓
行而往文裕亦贊成之業曰此必敗之勢也侁曰君侯
素號無敵得非有他志乎業曰時有未利徒令殺傷士
卒而功不立今君責業以不死當爲諸公先將行泣謂
美曰此行必不利因指陳家谷口曰諸君於此張步兵

强弩爲左右翼以援俟轉戰至此卽夾擊不然無遺類
矣美卽與侁領麾下兵陣於谷口自寅至巳侁使人登
托羅臺望之以爲契丹敗走欲爭其功領兵離谷口美
不能制業敗却走力戰自午至暮果至谷口望見無人
拊膺大慟再率帳下士力戰身被數十創士卒殆盡業
猶手刀數十百人馬重傷不能進遂爲契丹所擒其子
延玉亦沒焉業大息爲姦臣所迫不食三日死帝痛惜
下詔曰楊業誠堅金石氣激風雲而群師敗約援兵不
前獨以孤軍陷於沙漠勁果姦厲有死不回求之古人
何以加此可贈太尉大同軍節度潘美降三官王侁劉

宋史新編卷之二十七
文裕除名業與士卒同甘苦爲政簡易故士卒樂爲用朔州之敗麾下尚百餘人業謂曰汝等各有父母妻子與我俱死無益也可走還報天子衆感泣不肯去淄州刺史王貴矢盡遂死餘亦死無一生還者聞者皆流涕業既沒朝廷錄其子延朗延浦延訓延瓌延貴延彬延昭本名延朗太平興國中補供奉官歷保州緣邊都巡檢使就加如京使咸平二年以功拜莫州刺史是冬契丹南侵延昭伏銳兵於羊山西北掩擊獲其將進本州團練使與保州楊嗣竝命帝謂宰相曰嗣及延昭竝出疎外以忠勇自效忌嫉者衆朕力爲保庇以及於此

五年契丹侵襲軍士多喪失代還將治其罪帝欲收其後效宥之六年復用延昭爲都巡檢使又徙寧邊軍部署景德中累遷高陽關副都部署延昭不達吏事常遣小校周正治訴牒頗爲所罔因緣爲姦帝戒之斥正還營卒年五十七延昭智勇善戰所得奉賜悉犒軍未嘗問家事出入騎從如小校號令嚴明與士卒同甘苦遇敵必身先行陣推功於下故人樂爲用在邊防二十餘年契丹憚之目爲楊六郎及卒河朔之人多望柩而泣帝嗟悼錄其三子文廣最顯

文廣字仲容以功授殿直累遷興州防禦使瑋琦使築

算築城文廣聲言城噴珠率眾急趣算築比暮至其所部分已定遲明敵騎大至知不可犯而去文廣遣將襲之斬獲甚衆或問其故曰先人有奪人之氣彼若知而據之則未可圖也詔書褒諭賜襲衣帶馬遷步軍都虞候遼人爭代州地界文廣獻陣圖并取幽燕策未報而卒贈同州觀察使

王貴者并州人廣順初補衛士宋累遷淄州刺史從潘美北征頗立戰功及從楊業爲遼兵所圍矢盡張空拳又擊殺數人遂遇害年七十三錄其二子

荆罕儒冀州人少無賴爲群盜晉天福中相率詣范陽

委質燕王趙延壽得掌親兵延壽從契丹入汴署罕儒密州刺史歷仕漢周累功遷至秦州團練使軍吏者父詣闕請留恭帝詔褒之建隆初改晉州兵馬鈐轄恃勇輕敵嘗率騎深入晉境虜獲甚衆是年冬復抵汾州次京土原劉鈞遣大將郝貴超襲之遂遇害太祖痛惜不已錄其子因索不效命者黜王繼勳閻彥進斬部下指揮使石進德等二十九人罕儒輕財好施有供奉官張奉珪使秦州自言後唐張承業之子罕儒曰我生平聞張特進名幸而識其子厚加禮待然好勇善戰不顧勝負而及於敗兄延福延福孫嗣

宋史紀事本末卷之七十七
嗣初應募為控鶴卒，以功補御龍直。太平興國初三，遷至天武軍校。太宗再征太原，嗣自陳願率一隊先登，足貫雙箭，中手礮折二齒。太宗亟召賜袍帶，從征幽州。補龍猛副指揮使。六年，從崔彥進，兩敗契丹。八年，李繼遷寇邊，從袁繼忠、田欽祚戍三义口，為前鋒，連敗之。又賜袍帶。雍熙三年，從田重進、譚延美率師入契丹境，疾戰飛狐口，進至城北，敵將大鵬翼率眾復至，短兵接戰，大敗之餘，眾屯土嶺，復力戰，追奔五十餘里。數日，契丹復致師，乘夜復圍直谷石門二砦，一日凡五七戰，遂引去。咸如嗣所料，以功補本軍都虞候。又從李繼隆禦敵於

北平砦，遷本軍都指揮使，領澄州刺史。至道二年，加御前忠佐馬步軍頭屯定州。契丹復入侵，隸范廷召提偏師，捍於嘉山。咸平三年，加領本州團練使，出為郎山路都巡檢使，破敵砦於蒲陰，俘獲甚眾。五年，真拜蔡州團練使。趙州部署，踰年徙滄州。後歷虢州防禦使、邠寧環慶副部署。卒。嗣起行間，居方面，經百五十餘戰云。

曹光實，雅州人。父疇，為蜀靜南軍使。光實嗣職，遷永平軍節度。管內捕盜遊奕使。乾德中，太祖命王全斌等平蜀，俄而盜賊群起，夷人張忠樂者嘗群行攻劫，且憾光實殺其徒黨，中夜奄至，環其居，鼓譟竝進。光實負其母

宋史新編卷七十七
五
揮戈突圍以出賊殺其族三百餘口又發冢墓光實詣
全斌具以事白誓雪冤憤圖雅州地形要害兼陳攻取
之策全斌壯其志令率兵先導東克其城獲忠樂而甘
心焉殘寇盡平之遂知黎雅二州兼都巡檢使後全斌
遣入貢乞罷義軍歸農太祖喜謂左右曰此蜀中傑俊
也父之以爲黎州刺史又改唐州及平交廣爲嶺南諸
州都巡檢使太宗就遷本州團練使改汝州李繼捧之
入朝也以光實爲銀夏綏麟府豐宥州都巡檢使繼捧
弟繼遷爲邊患光實掩襲俘斬獲繼遷母妻繼遷僅免
使人給光實曰勢窘不能自存公許我降乎期某日降

於葭蘆川光實信之且欲專其功不與人謀及期往赴
之遂遇害卒年五十五帝驚悼錄其子從子克明
克明字堯卿補衙內都虞候光實戰歿克明時護輜重
在後懼軍亂祕不發喪陽令人西來傳光實命還軍銀
州而潛與僕張貴入敵中獲光實尸以還葬京師繇是
顯名初蜀人留京師者禁不得還鄉里克明以母老間
道歸賊陷雅州克明募衆數萬迎王師遂復九縣分兵
邀賊復收雅州蜀平擢西頭供奉官以餘寇未息權邛
州駐泊巡檢明年潰卒鄧紹等復起攻雅州克明又平
之還軍邛州遇賊王珂戰于延貢鎮後又設伏山下以

數十騎與賊接戰克明僞北而所部失期伏不發克明挺身走賊追急乃倚大石引弓三發斃三人由是獲免入朝改內殿崇班爲溫台等七州都巡檢使景德中蠻寇邕州改供備庫副使知邕州代還真宗問南方事對稱旨賜一子官遷供備庫使江淮兩浙都大提舉捉賊克明使人捕賊輒出私錢資之以故人人盡力視賊中趨勇者釋縛使還捕其黨前後獲千餘人知江寧府張詠以其事聞賜錢四十萬領平州刺史知辰州撫水蠻叛徙宜融桂昭柳象邕欽廉白十州都巡檢使兼安撫使既至蠻酋獻藥一器曰溪峒藥藥箭中人以是解之

可不死克明曰何以驗之曰請試以雞犬克明曰當試以人乃取藥箭刺酋股而飲以藥卽死群蠻慙懼而去未幾知杜州兼管勾溪峒公事始置溪峒司累遷西上閤門使歷知登舒邵三州復徙鼎州卒

張暉幽州人後唐累遷奉國弩手都頭歷晉漢周遷至耀州刺史宋初從征澤潞事平遷華州團練使在郡有治狀太原未下詔入覲問計暉對曰不若戢兵育民俟富庶而後爲謀朝廷方議伐蜀遷鳳州團練使兼緣邊巡檢壕砦橋道使暉盡得險易因密疏陳之太祖大悅乾德二年以暉充西川行營先鋒都指揮使督兵開大

散關路且役且戰人忘其勞未幾卒天禧五年暉妻年百五歲家貧詣闕自陳詔賜束帛錄其孫永德司超大名人事漢歷宿州西固鎮守禦都指揮使移屯潁州下蔡鎮屢與淮人戰有功周遷至舒州團練使宋初累遷鄭州防禦使其後朝廷將討江左以超久在淮右習知江山險易徙蘄州行至淮西卒

論曰昔晉荀林父不能遏先穀之違命故楚得敗之于邲春秋蔽罪林父以專制之柄在焉王侁剛愎頗類先穀楊業既知不可與契丹十萬衆爭鋒乃為侁所激覆軍隕軀誰之咎也荆罕儒曹光實竝貪而輕闇機宜世

豈有暴虎馮河能僥倖者乎然三人寔當捍城之寄臨

戎力戰趣刃如歸蓋異夫偷生喪節者而業部將王貴

及麾下百餘人悉從以沒其有田橫之風哉楊延昭荆

嗣載振家聲張暉司超亦樹有邊績咸足尚云

李進卿 子延渥 楊美 何繼筠 子承矩

李漢超 子守恩 郭進 牛思進 附 李謙溥 子允正

姚內斌 董遵誨 賀惟忠

馬仁瑀

李進卿并州人少隸護聖軍晉天福中以戰功擢興順軍校周歷內殿直都虞候宋初累功遷至步軍都指揮

使領靜江軍節度卒年五十九贈侍中子延渥延信
延渥以蔭補供奉官歷知平戎寧邊順安軍保州威虜
軍鈐轄又知冀州徙瀛州景德初契丹大舉擾邊經胡
盧河踰關南抵城下四面夾攻延渥擊之殺傷甚衆翌
日契丹急擊發矢如雨延渥分兵拒守益堅契丹遁去
驛書以聞擢本州團練使通判陸元凱推官李翔錄事
參軍蔡亨竝進秩又聞城守之際陸元凱流矢中面巡
檢史普勇敢不避敵復遷元凱屯田員外郎普尚食副
使普尋卒後延渥徙知邢州歷右領軍衛大將軍領演
州團練使既而從其請以左武衛大將軍致仕卒

揚美并州人本名光美避太宗舊名改焉美狀貌雄偉
武力絕人周鐵騎都指揮使領白州刺史太祖與美有
舊卽位以爲內殿直都知建隆中升青州北海縣爲軍
以美爲軍使爲政尚簡易民皆德之數年召還民數百
詣闕乞留詔諭之不去答爲首者始罷遷馬步軍都頭
歷保靜軍節度卒年四十八贈侍中美爲人任氣好施
死之日家無餘財

何繼筠字化龍河南人父福進周節度使繼筠歷隸州
刺史西北面行營都監宋初升隸州爲團練以繼筠充
使嘗爲關南兵馬都監又加本州防禦使開寶元年命

將征太原以繼筠為先鋒部署擒其二將以獻二年親征晉陽契丹來援召繼筠至行在授以方略命將精騎赴石嶺關拒契丹謂之曰翌日亭午俟卿來奏捷也至期帝御北臺以俟見一騎自北來亟遣逆問之乃繼筠子承睿來獻捷生擒刺史二人斬首千餘級初并人恃契丹為聲援及是命以所獲首級鎧甲示城下并人喪氣拜繼筠建武軍節度判隸州三年來朝詔賜鞍馬戎仗令戍邊明年卒年五十一帝謂侍臣曰朕不早授繼筠方鎮者慮其數奇耳纔領節制果至淪沒可惜也贈侍中繼筠深沉有智略前後備邊二十年與士卒同甘

苦得其死力邊人畏伏多畫像祠之子承矩世三子承矩字正則幼為隸州衙內指揮使事太祖太宗以平寇功自閒廐副使遷為使疏害民數十事上之又知河南府時調丁男百十輩轉送上供綱承矩以為橫役奏罷其事徙知潭州凡六年囹圄屢空帝嘉獎之入為六宅使端拱元年領潘州刺史命護河陽屯兵時契丹撓邊承矩疏請順安砦西貯水為屯田乃以承矩董其役既成民賴其利語在食貨志淳化中擢西上閣門使知滄州踰年徙雄州至道元午契丹夜襲城下承矩整兵出拒擒其酋所謂鐵林相公者契丹遁去太宗意其輕

率致寇徒滄州既而知其功狀進擢加賚之真宗立復遣知雄州咸平二年契丹南侵屢密詔問計嘗詔聽邊民越拒馬河塞北市承矩上言非便即停前詔三年拜引進使州民詣闕貢馬乞借留詔書嘉獎復遣之承矩上疏謂契丹恃騎戰之利頻年犯塞望慎擇疆吏優以奉祿借以威權然後布政行惠廣安輯之道闢田疇蓄芻粟以備凶年脩器械繕堡戍以防外患則邊城按堵矣又謂齊桓晉文皆募兵以服鄰敵故強國之君必料其民有膽勇者聚為一卒樂進戰効力以顯忠勇者聚為一卒能踰高赴遠輕足善鬪者聚為一卒此三者內

可以決圍外可以屠城古稱良策請試行之又謂權場之設蓋先朝從權立制以惠契丹縱渝信犯盟亦不之廢今因其犯塞尋即停罷去歲以臣上言於雄州置場賣茶雖貨竝行而邊氓未有所濟乞延訪大臣議其可否五年詔兼領制置屯田使始建權場或者謂契丹無厭未足誠信徒使公行窺伺會契丹有殺斥候卒者復罷之景德初入朝進領英州團練使真宗謂宰相曰承矩讀書好名以才能自許宜擇善地處之乃出知澶州承矩自守邊以來欲朝廷懷柔為息兵之計及是車駕按巡本部卒與契丹和益加勸賞明年復知雄州三

年真拜雄州團練使時置緣邊安撫使命承矩爲之且
詔邊民誘其復業承矩曰契丹聞之必謂誘其部屬也
乃易詔文爲水旱流民之意樞密以爲擅請罪承矩帝
釋不問承矩善推步自知冥數乃以老疾求僻郡授齊
州團練使至郡七日卒年六十一特贈相州觀察使錄
其四子邊民間其卒相率詣雄州發哀飯僧云
李漢超雲中人周殿前都虞候宋累遷齊州防禦使兼
關南兵馬都監關南人有訟漢超強取其女爲妾及貸
而不償者太祖召而問之曰汝女可適何人曰農家也
又問漢超未至關南契丹如何曰歲苦侵暴曰今復爾

耶曰否太祖曰漢超朕之貴臣也爲其妾不猶愈於農
婦乎使漢超不守關南尚能保汝家之所有乎責而遣
之密諭漢超曰亟還其女并所貸朕姑貰汝勿復爲也
不足於用何不以告朕耶漢超感泣誓以死報在郡十
七年吏民愛之詣闕求立碑頌德太祖詔徐鉉撰文賜
之旣與馬仁瑀交惡太祖賜金帛令和解焉太宗遷應
州觀察使判齊州仍爲關南巡檢卒軍中皆流涕贈太
尉忠武軍節度子守恩
守恩少驍果善戰有父風累官至隴州刺史知靈州與
轉運使陳緯部芻糧過瀚海爲賊所邀守恩及子象之

望之弟守忠皆沒真宗震悼特贈守恩洪州觀察使
郭進博野人少貧賤爲傭保有膂力倜儻任氣結豪俠
嗜酒捕博其家少年患之欲圖殺進婦竺氏陰知其謀
進遂走晉陽依漢祖累遷乾坊二州刺史少帝改磁州
周廣順初遷登州刺史會群盜攻劫率兵平之民吏詣
闕請立屏盜碑許之顯德初移衛州亡命者出沒椎剽
設計發擿剪滅無餘郡民又請立碑記其事改洺州團
練使有善政郡民復詣闕請立碑頌德詔左拾遺鄭起
撰文賜之進嘗於城四面植柳壕中種荷芰蒲葦後益
繁茂郡民見之有垂涕者曰此郭公所種也建隆初遷

本州防禦使充西山巡檢嘗與曹彬王全斌入太原境
獲數千人開寶中親征河東爲行營前軍馬軍都指揮
使後又征河東爲河東道忻代等州行營馬步軍都監
招徠山後諸州民三萬七千餘口太平興國初領雲州
觀察使判邢州仍兼西山巡檢四年車駕將征太原命
進爲都部署以防北邊契丹果犯關進大破之自是并
人喪氣時田欽祚護軍恣爲姦利進力不能禁屢形於
言進性剛烈戰功高欽祚以他事侵之心不能甘自經
死年五十八欽祚以暴卒聞贈安國軍節度後頗聞其
事罷欽祚內職爲房州團練使進性喜殺士卒小違令

必寘於死御婢僕亦然在西山日太祖遣戍卒必諭之
曰汝輩謹奉法我猶貸汝郭進殺汝矣然能以權道任
人嘗有軍校自西山詣闕誣進者太祖詰知其情狀送
與進令殺之會弁人入寇進謂誣者曰汝能立功卽薦
汝於朝其人踴躍聽命果致克捷進卽以聞乞遷其職
太祖從之初太祖令有司造宅賜進悉用甯瓦有司言
舊制非親王公主之第不可用帝怒曰進控扼西山十
餘年使我無北顧憂我視進豈減兒女耶
牛思進者祁州人少從軍以膂力聞嘗取強弓絀於耳
以手引之令滿又負墻立力士二人撮其乳曳之疑不

動軍中咸異之郭進卒命思進代之師還以功改本州
團練使授右千牛衛上將軍致仕卒

李謙溥字德明并州人性慷慨重然諾通左氏春秋歷
仕晉漢周以戰功遷至澶州巡檢使丹州刺史乾德元
年移慈州兼晉隰緣邊都巡檢行石州事未幾移隰州
刺史開寶元年命李繼勳等征太原以謙溥爲汾州路
都監太祖征晉陽爲東砦都監前軍副部署謙溥在州
十年敵人不敢犯境有招收將劉進者勇力絕人謙溥
撫之厚藉其死力往來境上以少擊衆弁人患之爲蠟
丸書以間進佯遺書道中晉帥趙贊得之以聞太祖令

宋史新編卷七十一
械進送關下謙溥謂進曰我以舉宗四十口保汝矣即
上言進爲并人所惡此乃反間也帝悟遽令釋之三年
召謙溥爲濟州團練使後邊將失律復爲晉陽緣邊巡
檢使邊民間之爭相迎勞於道左六年領兵入太原連
拔七砦八年以疾求歸京師卒年六十二謙溥與宣祖
同里閭弟謙昇與太祖爲布衣交其母閭嘗厚待太祖
及即位數迎入宮中命坐飲食話及舊故賜賚優厚雍
熙中太宗爲許王納謙昇女爲夫人以謙昇爲如京副
使謙溥子允則允正

允正字脩已以蔭初歷閣門通事舍人時女弟適許王

因質其居第太宗謂曰爾父守邊二十餘年止有此第
即遣內侍輦錢爲贖措紳咸賦詩頌美累功遷至東上
閣門使歷知鎮莫二州又爲并代馬步軍鈐轄咸平五
年合涇原儀渭邠寧環慶路爲一界驛召允正爲鈐轄
兼安撫都監又命同錢若水詣沿邊諸砦經度邊事加
領誠州刺史改客省使知定州兼鎮定都鈐轄大中祥
符中歷鄜延部署領河州團練使徙知永興軍卒允正
頗知書性嚴毅疎財喜自脩飭素病疴僂以是罕在要
近累典邊任多殺戮云

姚內斌盧龍人仕契丹爲關西巡檢凡橋關使太祖從

宋史紀事本末卷之七十一
世宗北征內斌以城降授汝州刺史宋初歷慶州刺史
在郡十數年西夏不敢犯塞號為姚弋弋言其武猛也
卒年六十四本名犯宣祖諱改今名云

董遵誨范陽人父宗本為漢隨州刺史遵誨署隨州牙
校周錄其前後功遷至驍武指揮使太祖微時客遊至
漢東依宗本遵誨憑藉父勢太祖每避之遵誨嘗謂太
祖曰每見城上紫雲如蓋又夢遇黑蛇長百尺餘俄化
龍東北去雷電隨之是何祥也太祖皆不對他日論兵
戰事遵誨理多屈拂衣而起太祖迺辭去自是紫雲漸
散及卽位召見遵誨伏地請死因諭之曰卿尚記往日

紫雲及化龍之夢乎遵誨再拜呼萬歲俄而部下訴其
不法太祖釋不問召諭之曰朕方赦過賞功豈念舊惡
耶遵誨母在幽州太祖令人賂邊民竊迎其母送與遵
誨遵誨遣外弟劉綜貢馬以謝太祖解所服重珠盤龍
衣命齎賜之綜曰遵誨人臣豈敢當此太祖曰吾方委
以方面不此嫌也既而命從慕容延釗討李筠遷馬軍
都軍頭再遷為散員都虞候開寶元年以西夏近邊授
通遠軍使恩威並行夷落以定太祖嘉其功就拜羅州
刺史太宗卽位兼領靈州路巡檢遵誨不知書豁達無
崖岸多方略能挽強命中在通遠十四年夏人悅服秋

牙列系卷十一
毫不敢犯卒年五十六帝軫悼錄其子
賀惟忠定襄人少勇敢善騎射周授儀鸞副使令知易
州捍邊有功尋遷正使開寶中太祖駐常山以為本州
刺史兼易定祁等州都巡檢使嘗中流矢金瘡發而卒
錄其子昭度惟忠性剛果知書曉兵法有方略在易州
繕完亭障撫士卒得其死力威名震北邊故十餘年間
契丹不敢南牧

馬仁瑀大名人十餘歲時鄉校習孝經旬餘不識一字
博士咎之仁瑀夜中獨往焚學堂博士僅以身免常集
里中群兒數十人與之戲為行陣之狀自稱將軍日與

之約鞭其後期者羣兒皆畏伏又市果均給之益相親
附及長善射挽弓二百斤周補內殿直會劉崇入寇世
宗親征周師不利諸將多引退仁瑀謂衆曰主辱臣死
安用我輩乃控弦躍馬挺身出陣射賊大軍乘之崇遂
敗績諸將坐失律誅者七十餘人擢仁瑀為弓箭控鶴
直指揮使至內殿直都虞候恭帝嗣位詔從太祖北伐
太祖受禪以佐命功授散員都指揮使領貴州刺史累
擢至岳州防禦使移領漢州初詔仁瑀等領荆湖諸郡
不數歲復其地至是將征蜀又詔領川峽諸郡遂平之
先是薛居正知貢舉仁瑀私囑所與者榜出無其人聞

喜宴日仁瑀酒酣攜所囑者詣居正切責之爲御史中丞劉溫叟所劾帝優容之王繼勳以后族驕恣凌蔑將帥人皆引避獨仁瑀詞氣不相下會帝將講武郊外遂欲相圖各勒所部兵私市白挺帝密知之詔罷講武出仁瑀爲密州防禦使羣盜起兗州賊首周弼毛襲甚勇悍材貌奇偉弼號曰長脚龍監軍討捕數不利詔仁瑀掩擊擒弼盡獲其黨開寶四年遷瀛州防禦使兒子嘗因醉誤殺平民民家自言非有宿憾願以過失殺傷論仁瑀曰我爲長吏而兒子殺人此怙勢爾非過失也豈敢以私親亂國法哉遂論如律太宗遷至朔州觀察使

判瀛州事卒年五十贈河西軍節度

論曰宋初群雄爭衡一虜時爲邊患故常注意謀帥命何繼筠領棣州李漢超屯關南賀惟忠守易州馬仁瑀守瀛州以拒契丹不但常山之韓令坤而已又命郭進控西山李謙溥守隰州以禦太原不但晉州之武守琪昭義之李繼勳而已又命姚內斌守慶州董遵誨屯環州以備西夏不但延州之趙贊原州之王彥昇靈武之馮繼業而已郡中筦權之利悉以畀之恣往來貿易不復征許其召募爪牙軍事得便宜入朝必召對賜坐豐宴賚有細過置不問而厚撫族屬在京師者彼匪特銜

恩圖報且富貴能養士為間諜折衝應變動周掣肘故
二十年間無西北之憂而西蜀荆湖嶺表江南諸國咸
破竹舉之謂非御將有要術哉李進卿楊美亦累戰功
而美居北海務在安輯誠得武之善經就謂開國之武
功不競耶

宋史新編卷七十七

宋史新編卷七十八

明南京戶部主事莆田柯維騏編

王贊 張保續 盧懷忠

王繼勳 侯贊 翟守素 王文寶 劉審瓊

趙玘丁德裕張延通梁迥 史珪田欽祚王侁附

王贊澶州人起小吏歷武階周世宗累遷右驍衛將軍
三司副使時張美為使世宗問京城衛兵歲廩幾何美
不能對贊代奏甚悉美銜之及征關南言於世宗以為
客省使領河北諸州計度使所至發摘姦伏一矯姑息
之弊邊臣頗切齒師還復舊職太祖平李重進知贊材

可委以完葺，命知揚州。既行，舟覆閘橋下，溺死。上嗟悼，謂左右曰：「溺吾樞密使矣，蓋將大用也。」賻其家。張保續，字嗣光，京兆人。以父洪蔭登仕，歷五代，遷至客省使。宋初，遷衛尉卿，判四方館，客省閤門事。保續性介直，好儉素，在閤門前後四十年，善宣贊，辭令聽者傾聳。累使藩國，不辱命。更六朝，未嘗有過。卒，年六十四。盧懷忠，河間人。漢乾祐初，補供奉官。顯德初，遷如京副使。宋遷內酒坊副使，會朗州軍亂，太祖將致討，遣懷忠使荆南，還奏曰：「觀其形勢，蓋日不暇給。」太祖召宰相曰：「江陵四分五裂之國，今出師湖南，假道荆渚，因而下之。」

萬全策也。卽以懷忠爲前軍步軍都監，荆湖平，以功遷爲使，終客省使。

王繼勳，陝州人。隸河中府，爲牙校。李守貞之叛，繼勳出降，補供奉官。周歷憲麟石磁四州刺史。宋初，歷道州刺史。州境接廣南，劉鋹屢引兵入寇，繼勳因上言嶺表可圖狀，及王師南伐，以爲賀州道行營馬步軍都監。繼勳有武勇，在陣常用鐵鞭鐵槊鐵槌。軍中目爲王三鐵。侯贇，太原人。在漢以父義蔭補官。至周爲供奉。江南復命，領三門集津發運使。宋初爲諸衛將軍。先是朝廷歲仰給關中穀麥，贇掌其事三十年，國用無闕。遷至右武

衛將軍後知建安軍揚徐二州皆有善政太宗累遷右
衛大將軍知靈州得邊士心遷左衛在朔方凡十餘年
求可代者難其人卒于官贈左衛上將軍
翟守素任城人以父溥任爲殿直歷漢周遷供奉官領
承天軍使乾德中爲引進副使從王全斌伐蜀擢判四
方館以兩川餘寇未殄再令入蜀經略諸郡開寶中從
征太原轉引進使又命爲劔南十州都巡檢使太宗卽
位遷客省使領憲州刺史錢俶獻浙右地詔守素爲兵
馬都監安撫諸郡人心甚悅卽以知杭州歲滿爲西京
巡檢使又權知河南府兼留守司事遷商州團練使雍

熙中歷知鳳翔府淳化中徙石州以老病上疏求歸本
郡從之卒年七十一守素逮事四朝繇歷內職五十餘
年性謹厚寬容所至有治績新進後生多至節帥而守
素久次不遷殊無隕穫意時論多之

王文寶陽武人以任子補殿直累遷判四方館事文寶
歷內職三十年雅好言外事太祖太宗頗信任之中外
咸畏其口出爲高陽關兵馬鈐轄卒于官

劉審瓊范陽人太祖節鎮給事左右及受禪遷至軍器
庫使會樞密使李崇矩門人鄭伸擊瓮聞鼓誣告崇矩
受太原席義叟黃金私結翰林學士扈蒙以甲科私義

叟引審瓊爲證上怒召審瓊詰問審瓊具言誣枉得解遂出知鎮州太宗之征河東也駐蹕月餘儲待無闕遷領澶州刺史知潭州徙河陽後授坊州刺史卒審瓊雅善酒令博鞠年八十餘筋力不衰孫爽進士及第趙玘澶州人在晉納粟助邊補集賢小史歷秦成階等州觀察判官周顯德初以城歸朝授郢州刺史歷汝密澤三州宋初歷左監門衛大將軍判三司玘狂躁倖直多忤上旨頗優容之嘗潛奏宰相趙普私市秦隴大木事懼普知因稱足疾求解職踰年罷使守本官自是累獻密疏皆留中常疑普中傷詣闕納所授告命詔勸歸

私第又請退居鄆州不許玘不勝忿踰年伺普入朝馬前揚言其短上聞之召玘及普面質其事玘大言詆普販木規利上怒促令集百官逐普王溥等奏玘誣罔乃詰責玘命武士撻之黜爲汝州牙校卒

丁德裕洛州人在周以父審琦蔭補供奉官宋遷至內客省使持蜀初平寇大起用爲西川都巡檢使與張延通等率師討之盡平其黨歸朝陷延通棄市事在延通傳又奏轉運使李鉉嘗醉酒言涉指斥上怒驛召鉉下御史案之鉉言德裕在蜀日屢以事請求多拒之皆有狀御史以聞太祖悟止坐鉉酒失左授未幾德裕亦出

宋史新編卷之十一
知潞州歷常潤等州經略巡檢使德裕以傾險為眾所
惡恃勢剛狠不恤士卒黷貨無厭越人苦之錢俶奏其
事貶房州刺史卒

張延通潞城人周時以父彥成蔭補官宋歷東上閣門
副使開寶中為西川兵馬都監同丁德裕王班及內臣
張嶼討蜀寇德裕頗專恣延通面質其短又與嶼不協
延通亦為解之德裕疑與嶼為黨益不悅會嶼先歸闕
賜予甚厚延通德裕繼至則召延通顧問待德裕稍薄
德裕疑懼誣奏延通嘗對眾言涉指斥且多不法事指
嶼為黨太祖怒即收鞫引問延通抗對不遜遂斬之

梁迴聊城人在周為左藏庫使宋初屢有征討之事以
功遷至東上閣門使開寶五年命為廣南道兵馬都監
兼諸州巡檢八年奉使江南迴素貪冒外務矯飾初若
嚴毅不可犯雖饋食亦不受江南人頗憚之既而奉以
貨貨殆直數萬緡迴即大喜過望登舟縱酒繼日宴樂
及歸戀戀不發人多笑之江南平領順州團練使太宗
歷授唐州防禦使復召為銀夏都巡檢使來迴性麤率
不喜文士故事節帥出鎮及來朝便殿宴勞翰林學士
皆預坐迴白太祖曰陛下宴犒將帥安用此輩預坐乃
罷之至淳化中復焉

史珪洛陽人周時爲小校太祖累遷馬步軍副都軍頭兼控鶴弓弩大劔都指揮使又加都軍頭領毅州刺史太祖初臨御欲周知外事令珪博訪珪所廉事驗之皆實由是信之後乃漸肆威福民有市官物不當價者珪告其欺罔當寘法列肆無不側目上聞之因詔犯在詔前者一切不問自是珪不復敢言時德州刺史郭貴知邢州國子監丞梁夢昇知德州貴族人親吏之在德州者頗爲姦利夢昇以法繩之貴素與珪善告珪圖去夢昇珪悉記於紙伺便言之一日上因言爾來中外所任皆得其人珪遽探懷中所記以進曰祇如知德州梁夢

昇欺蔑刺史郭貴幾至於死上曰此必刺史所爲不法夢昇真清強吏也因以所記紙付中書曰卽以夢昇爲左贊善珪以譖不行居常怏怏坐漏洩禁中語出爲光州刺史歲饑淮蔡民流入州境珪不待聞卽開倉減價以糴所全活甚衆吏民詣闕請植碑頌德太平興國初以爲楊楚等九州都巡檢使四年從征太原又從征幽州坐失律貶數月召爲右衛將軍領平州刺史督浚惠民河民咸便之六年遷隰州刺史知保州靜戎軍上緣邊便宜十五事多從焉卒于官珪多智數好以甘言小惠取譽故所至不忍其去云

田欽祚汝陰人父令方漢虢州團練使與帳下伶人靖
邊庭妻通邊庭不勝忿會陝西三叛連衡關輔間人情
大擾邊庭率其徒夜縋入州靡害令方掠郡民乃錄欽
祚官宋初累功遷至西上閣門使開寶二年又與何繼
筠破賊于石嶺關領賀州刺史判四方館使朝廷將議
討江表遣欽祚往覘還奏合旨江南所得寶貨直三千
萬悉以賜之會興師以功加領汾州防禦使太宗遷引
進使爲晉州都鈐轄旣而從征太原護前鋒騎兵屯石
嶺關以扞契丹欽祚性剛戾多忤犯與主帥郭進不協
進多戰功屢爲所陵遂自縊死欽祚坐罷內職初賊兵

奄至欽祚但閉壁自守旣去又不追所受月奉芻粟多
販鬻規利爲部下所訴責授睦州團練使遷郢州在郡
二年入覲見上泣不已以爲銀夏綏宥都巡檢使俄召
還會征幽州命與郭守文爲排陣使時已被病受詔不
勝喜一夕卒欽祚性陰狡尤不喜儒人多惡之

王侁字祕權浚儀人父林周樞密使侁以父任歷東頭
供奉官開寶中征江南加閣門祗候太平興國初數往
來西邊多奏便宜上多聽用遷通事舍人四年從征太
原轉東上閣門副使晉陽平留爲嵐憲巡檢代還遷西
上閣門使賜錢百萬河西三族首領折遇也叛侁帥師

討擒之以功領蔚州刺史王師北征命為并州駐泊都
監又為雲應等州兵馬都監佻性剛愎以語激副將楊
業業因力戰死佻坐除名配隸金州事載楊業傳會赦
移均州團練副使後召還俄卒弟備偃竝進士及第
論曰王贊輩由門蔭牙校小吏起家率有一策一能可
採翟守素當用人如積薪之際不競不嫉儒者或媿之
若趙玘傾趙普丁德裕誣張延通田欽祚凌郭進史珪
譖梁夢昇王侁逼楊業構田仁朗雖累功伐而所傷實
多且欽祚與梁迥不喜文儒非狂五代之鄙習耶

劉福

安守忠

孔守正

譚延美

元達

郭密傳思讓
李斌附

常思德

尹繼倫

薛超

丁早趙瑄附

田仁朗

劉謙

劉福下邳人魁岸有膂力初隸周世宗麾下每戰令福
率衛士為先鋒錄淮南功授懷德指揮使宋初遷橫海
指揮使以與田紹斌夾擊蜀賊功授虎捷都虞候繼隸
曹彬麾下平江南還授指揮使領蔚州刺史從太宗克
并汾遷馬步都軍頭武州團練使累遷涼州觀察使判
雄州事卒年六十四贈太傅福雖不學而御下有方略
為政簡易人甚德之諸子嘗勸起大策福怒曰我受祿

宋史新編卷一百一十一

厚足以傲舍此汝曹既無尺寸功報朝廷豈可為自安計乎既死上聞其言賜其子白金五千使市第宅安守忠字信臣晉陽人父審琦為周節度使封陳王守忠歷衛州刺史宋初為左衛將軍歷漢州刺史時寇難甫平使車旁午公帑不足守忠出私錢以給用太祖每遣使必戒之曰安守忠在蜀能律已以正汝行見之當效其為人也開寶初改濮州又副潁州團練使又知遼州太宗時知靈州易州徙夏州西戎犯邊戰無不捷就拜濮州團練使後知滄州改瀛州遷瀛州防禦使初守忠嘗夢一濮字方丈餘及領是郡幾二十年於是始寤

誤瀛

淳化中徙知雄州方與僚佐宴飲有軍校謀變擐甲及闔闔者倉卒入白守忠言笑自若徐顧坐客曰此輩酒狂爾擒之可也人服其量累遷感德軍節度觀察留後知宋州兼制置營田使威德兼著吏民不忍其去卒年六十九贈太尉錄其子守忠謹慤淡薄為治簡靜太祖居藩日素相厚善及受禪每優任之守忠處之益謙從征太原多與謀略人罕知之者初審琦以愛妾故為隸人所戕故守忠終身不畜妓妾喜佞佛云

孔守正浚儀人歷事漢周至東班承旨宋初補內殿直從劉廷翰平蜀還遷驍雄副指揮使征太原隸何繼筠

宋史 卷一百一十一
麾下會契丹遣兵來援晉陽守正大敗之獲其將太宗
累遷殿前都虞候領容州觀察使一日侍宴北苑上入
玄武門守正大醉與王榮論邊功于駕前忿爭失儀侍
臣請以屬吏上弗許翌日俱詣殿廷請罪上曰朕亦大
醉漫不復省遂釋不問俄命爲定州行營副部署又擢
高陽關副都部署歷代夏二州部署真宗卽位復徙代
州咸平初授昌化軍節度觀察留後守正上言四任鴈
門邊亭义安願徙東北以自效會夏人入寇改定州行
營副都部署後移彰德軍留後以疾改安化軍景德初
以不任職代卒年六十六贈泰寧軍節度使

譚延美大名人少不逞爲盜周世宗鎮澶淵募置帳下
卽位以勞遷控鶴軍副指揮使太祖卽位擢至內殿直
都知太平興國初爲蘄州刺史連徙廬壽濠光州軍巡
檢使劇賊之爲害者悉就捕六年徙知威虜軍雍熙三
年舉兵北伐以功擢本州防禦使逾年改亳州出爲鎮
州鈐轄端拱元年徙知寧遠軍一旦契丹兵抵城下延
美開門示之不敢入遂引去二年進邕州觀察使判毫
州兼知代州徙知潞陝涇州咸平中以左領軍衛上將
軍致仕卒年八十三贈建武軍節度使
元達初名守旻雞澤人身長八尺餘負膂力善射任俠

宋史 卷一百一十八
縱酒嘗醉見道旁槐樹拔劍斬之樹立斷私喜曰吾聞
李將軍射石飲羽今樹爲我斷豈神助歟送徒闕下行
數舍乃悉縱之追捕至則援弓引滿追者不敢近由是
亡命山林間爲鄉里患太宗居晉邸達求見隸帳下嘗
侍射園亭爲更今名卽位累遷媯州刺史繼領本州團
練使時州郡部送亡命至左右諷殺之達奏赦之以開
自新之路從之歷北面行營都部署由常山鎮入爲京
城巡檢卒贈昭化軍節度同時以勇力隸晉邸者又有
郭密傅思讓李斌密經城人太宗卽位補指揮使擢至
安州觀察使充靈州兵馬都部署號令嚴肅夏人畏服

卒贈保順軍節度思讓信都人太宗累遷容州觀察使
知莫州移隴州特命殿中丞林特同判州事以夾輔之
蓋所爲多不法故也卒贈保順軍節度斌青州人太宗
累遷萊州洺州團練使勤於政理人服其清慎後拜桂
州觀察使仍判洺州徙滄州及代吏民不忍其去詔褒
之

常思德開封人周顯德初應募累遷神衛都虞候太宗
時數遷擢李順叛蜀命往夔陝招捕調兵掩殺盡殲其
黨以功真授汝州刺史初曹彬北征不利至涿州左右
皆潰散獨思德以所部護至易州語人曰旣備戎行當

宋史宗系卷十一
與主帥同死生若視利害為去就何面目見君父乎太宗嘗聞其言至是陛辭加慰勞焉未幾移慶州副都部署屯邠州真宗時改左神武大將軍卒
尹繼倫浚儀人父勳鄆州防禦使嘗內舉繼倫可用太祖以補殿直權領虎捷指揮太宗再遷洛苑使充北面緣邊都巡檢使端拱中威虜軍糧餽不繼契丹潛謀入寇上聞遣李繼隆發鎮定兵萬餘護送輜重契丹將于越謀知之率精銳邀于路繼倫適領兵巡徼路與寇直于越徑趨大軍不顧而去繼倫謂其麾下曰寇蔑視我爾彼南出而捷還則乘勝驅我而北不捷亦且洩怒於

我將無遺類矣為今日計但當卷甲銜枚以躡之彼銳氣前趨不虞我之至力戰而勝足以自樹縱死猶不失為忠義豈可泯然而死為胡地鬼乎眾皆憤激從命俟夜人持短兵潛躡其後行數十里至唐州徐河間天未明于越去大軍四五里會食訖將戰繼隆方陣于前以待繼倫從後急擊殺其將皮室一人皮室者契丹相也眾驚潰于越方食失箸為短兵中其臂創甚乘善馬先遁眾隨之大潰相蹂踐死者無數契丹自是不敢窺邊平居相戒則曰當避黑面大王以繼倫面黑也以功領長州刺史仍兼巡檢後累遷深州團練使領本州駐泊

兵馬部署至道二年分兵五道討李繼遷大將李繼隆逗撓不進上怒急召繼倫授靈慶兵馬副都部署欲以輔繼隆時繼倫已被病強起受詔上素聞其嗜酒以上尊酒賜而遣之至慶州卒年五十一上嗟悼賻贈加等遣中使護其喪歸葬

薛超平城人乾德初應募為虎捷卒以伐蜀功補虞候遷十將太平興國初四遷至天武指揮使以太原功加步軍都軍頭遷神衛軍都校領敘州刺史雍熙三年從潘美北征路與契丹遇戰敗之追至寰州裹創乘勝抵應州竝下其城事在本紀還加馬步軍都軍頭終天武

指揮使領澄州團練使同時由衛士進者又有丁罕趙瑫罕潁州人嘗知霸州河溢壞城壘罕以私錢募築民德之歷密州觀察使知威虜軍徙貝州子守德能世其家瑫清河人累功至兵馬部署卒贈歸義軍節度使田仁朗大名人父武仕晉昭義軍節度使仁朗以父任西頭供奉官太祖卽位累功遷至左藏庫使為中官所讒太祖怒立召詰之至殿門命去冠帶仁朗神色不撓從容曰臣嘗從破蜀秋毫無犯陛下固知之今主藏禁中豈復為姦利以自汙太祖怒釋止停其職後起為權易使西北邊內侵又選知慶州仁朗大破之其酋長相

宋史新編卷七十一
率請和璽書褒美太宗時爲西上閣門使歷判四方館
事李繼遷攻麟州誘殺曹光實遂圍三族砦命仁朗與
閣門使王侁等發邊兵數千擊之仁朗次綏州奏請益
兵留月餘俟報會三族砦將折遇也殺監軍使者與繼
遷合帝聞之大怒亟遣軍器庫使劉文裕代之仁朗不
知也繼遷乘急攻撫寧砦仁朗喜謂諸將曰撫寧未可
以旬浹破當留信宿俟其困以大兵臨之分強弩三百
邀其歸路必成擒矣仁朗部署已定欲示閒暇日縱其
檮博不恤軍事上知之召赴闕下御史按問獄具當死
上特貸之責授商州團練副使未幾上知爲王侁等所

構召拜右神武軍大將軍部脩河北東路諸州城池數
月而就留知雄州加領澄州刺史時河北用兵大藩多
用節將朝議以諸司使有吏幹者佐之以仁朗知定州
節度副使事俄召赴闕未聞命卒年六十仁朗性沉厚
有謀略頗涉書傳所至有善政死之日人多惜之

劉謙堂邑人曾祖直性純厚里有盜其衣者置不問州
將廉知俾人故竊其衣亦不訴理卽召詰前盜衣者俾
還之直給云衣乃自以遺少年非竊也州將義之賜以
金帛不受而去父仁罕累功至散都頭宋初遷至同州
都校謙少不拘小節仁罕資遣行商嘗爲鄉里惡少所

辱謙不勝怒，毆殺之。亡命京師，遂應募補衛士。稍遷內殿直都知，真宗卽位，累遷殿前副都指揮使，振武軍節度。先是，謙久權殿前都虞候，俄擢曹璨正授，謙頗形慨嘆。至是，璨副馬軍而升謙領禁衛焉。大中祥符初，從東封禮成，進授都指揮使，移領保靜軍節度。卒，贈侍中。論曰：夫輸忠奮勇，以捍禍亂，鎮疆場者，武人之職。若劉福輩，累勳膺寵，寡過保終，詎不難哉！考其發跡，僅一二出將家，餘率由草澤，或無賴亡命，咸能自勵自樹，全功名，易鼎初六之象，曰利，出否，以從貴也。其斯之謂歟。

宋史新編卷七十八

宋史新編卷七十九

列傳二十一

明南京戶部主事莆田柯維騏編

劉保勳 滕中正 劉蟠 孔承恭

宋璫 袁廓 樊知古郭載附臧丙

徐休復王延範附姚坦

劉保勳字修業，河南人。父處讓，晉彰德軍節度使。保勳補供奉官，習刑名之學，頗工詩。因獻于宰相，桑維翰奇之，奏擢爲太常丞。歷漢周，至工部員外郎。宋初，拜戶部員外郎，遷司封。太平興國中，歷右諫議大夫，知開封府。坐事奪奉，俄以辛仲甫代之。未幾，復判大理寺。雍熙二

年權御史中丞兼勾當差遣院三年曹彬等征幽州以保勳知幽州行府事子利涉以開封府兵曹督芻粟隨軍常從其父會王師不利濟巨馬河更相蹂躪多死保勳馬陷淖中利涉自後撤出之力不勝人馬相擠壓遂俱死時保勳年六十二贈工部侍郎錄其後優恤之咸平初其妻卒賜錢十萬保勳性純謹不忤物情於吏事不憚繁劇嘗語人曰吾受君命未嘗辭避接同僚未嘗失意居家積貲未嘗至千錢及死聞者咸痛惜之

滕中正字普光青州人周顯德中滑帥向拱奏辟爲掌書記及留守西路又奏署河南府判官檢校戶部員外

郎事太祖太宗歷擢右諫議大夫權御史中丞雍熙元年春大宴上歡甚以虛盞示羣臣宰相言飲酒過度恐失儀上顧謂中正曰今君臣相遇有失者勿彈劾也因是伶官盛言宴會之樂上曰朕樂在時平民安是冬乾明節羣臣上壽酒旣三行上目中正曰三爵之飲實惟常禮朕欲與羣臣更舉一卮可乎中正曰陛下聖恩甚厚臣敢不奉詔殿上皆稱萬歲二年以年老辭出知河南府未幾被病罷分司西京淳化初判留司御史臺命其子玄錫權河南司錄以便養未幾卒中正性峻刻連鞫大獄玄錫暨弟玄宴並第進士

劉蟠字士龍渤海人漢乾祐二年第進士解褐益都主簿宋歷遷左諫議大夫卒蟠性清介寡合能攻苦食淡頗事苛刻好設奇詐以售知人主典染作日太祖多臨視之蟠偵車駕至輒衣短後衣芒屨持挺以督役頭蓬不治遽出迎謁太祖以為勤事賜錢二十萬嘗受詔巡茶淮南部民私販者衆蟠乘羸馬偽稱商人抵民家求市得茶即擒真于法子錯以蔭為大理評事復第進士嘗獻幸太學頌真宗嘉賞之

孔承恭字光祖京兆人五世祖戡戡孫迥迥子昌庶昌庶子莊皆第進士承恭莊子也以蔭歷大理寺丞獻宮

詞託意求進太祖怒引喻非宜免歸後起歷屯田兵部二郎中同考校京朝官課第端拱三年詔曰九寺三監國之羽儀制度聲名往往而在各有副貳率其司存品秩素高職任尤重郎吏遷授斯為舊章比聞縉紳之流頗以臺閣自許目為散地甚無謂焉朕將振之自我而始於是承恭為太常少卿而宋雄等先為少卿皆改授東宮官承恭俄以疾請老且言早遊嵩少間樂其風土願卜居焉授將作監致仕卒承恭少疎縱及長能折節自勵嘗疏請令州縣長吏詢訪耆老求知民間疾苦吏治得失皆為行之尤奉佛多蔬食嘗勸上不殺人又請

於征戰地脩寺及普度僧尼云
宋璫字寶臣華州人乾德中進士及第拔萃登科解褐
青城簿歷知綿州太宗累遷左諫議大夫歷知陝州淳
化中三吳歲饑特命知蘇州璫體豐碩素病足州卑濕
疾益甚或勸謝疾北歸璫曰天子以民病俾我綏撫我
何可以身病辭既而太白犯南斗曰斗爲吳分民方飢
長吏得無咎乎未幾卒年六十一上嗟悼錄其子明遠
璫性清簡歷官三十年未嘗問家事唯聚書貽子孫且
曰使不忘本也明遠第進士弟柔遠進士及第
袁廓劍州人蜀進士及第入宋補雙流縣簿累擢太子

右贊善大夫廓夸誕敢大言好詆訐太祖以奇士待之
太宗遷殿中丞知楚州歸掌京師市征歲中增課數萬
緡賜緋魚賚錢百萬詔公宴別席以寵異之復命知鄆
州拜監察御史歷度支判官轉本曹郎中判戶部勾院
廓強項好爭數與判使等較曲直上前聲氣俱厲上每
優容之然勾稽精密由是部領擁積爲郡吏所訴出知
溫州就遷鴻臚少卿袁仁甫掌州之關征宗盟之分頗
相親善一旦不協互有論奏上遣光祿寺丞牛韶往按
驗韶至竝攝繫獄置對上疑廓被誣驛召赴闕廓性剛
褊詔未至以憤死上悼之驗仁甫所訴無實狀贈廓右

諫議大夫錄其子免韶官削仁甫名籍配隸商州
樊知古字仲師父潛事李景令漢陽石埭二縣因家池
州知古嘗舉進士不第遂謀北歸迺漁釣采石江上數
月乘小舟載絲繩以度江之廣狹開寶三年詣闕上書
言江南可取狀太祖令送學士院試賜本科及第解褐
舒州軍事推官七年召拜太子右贊善大夫王師征江
表知古爲鄉導下池州八年遂領州事金陵平拜待御
史授江南轉運使豫章洪氏嘗掌昇州權酷逋鐵錢數
百萬至是知古挾微時常辱於洪責償以快意太宗累
遷駕部郎中知古本名若水字叔清上嘗問卿名出何

書對曰唐尚書右丞倪若水亮直臣竊慕之上笑曰可
改知古蓋倪若水實名若冰云端拱初遷右諫議大夫
河北東西路轉運使兩路各置轉運副使都轉運使之
名自知古始二年詔加河北西路招置營田使入朝奏
事稱旨拜給事中俄爲戶部使頻以職事不治詔書切
責素與陳恕親善恕時參知政事上言及計司事有乖
違者恕具以告後因奏事知古遂自解上詰其由曰陳
恕告臣上怒恕泄禁中語且嫉知古輕佻兩罷之出知
古知梓州未至改西川轉運使常稱疾鬱鬱不得志淳
化中青城盜王小波起謂其衆曰吾疾貧富不均今爲

汝輩均之附者至萬餘人陷成都時已詔張雍代知古雍未至知古與知府郭載走東川詔復令掌兩川漕運知古具伏擅離所部制置無狀上特宥之以本官知均州視事旬日憂悸卒

郭載字咸熙浚儀人以蔭歷遷西上閣門使改知成都府載在天雄軍屢奏市糴朝臣段獻可馮侃等所市麤惡不可給軍食太宗頗疑使覆驗之及報與載奏同獻可等皆削官仍令填償及載受代獻可等所市皆支畢復有羨數三司判勾馮拯以聞帝召宰相謂曰郭載朕向以純誠待之何為矯誣及此然已委西川俟還別當

詰責於是獻可等悉復官載行至梓州適李順構亂載即日入成都順兵攻城急不能拒守乃與樊知古率僚屬斬關出以餘眾隨招安使王繼恩討平之復入成都月餘以憂患卒載前在蜀頗能為民除害再至成都亦有所全濟其死也人多惜之

臧丙字夢壽大名人第進士歷右贊善大夫知遼州丙素剛果有吏幹會同年生馮汝士知石州與監軍不協一夕剗刀於腹而死丙疏汝士非自殺乞按治太宗嘉其直累遷右諫議大夫知江陵府卒丙舊名愚字仲回既孤嘗夢其父召於庭向空指曰老人星見矣因望而

拜既寤私喜以壽星出丙入丁乃改名至是不驗年僅五十三云次子列進士及第

徐休復字廣初濮州人太宗時第進士歷比部郎中樞密直學士知廣州與轉運使王延範不協乃奏延範反狀抵於法遷至給事中知青潞二州初休復上言父母藁葬青社願領是州營丘隴及至青州踰年但務聚財殖貨終不言葬事至潞州數月瘍生於腦比劇若見王延範號呼稱死罪數日卒休復多鄙行無他才能嘗掌誥命弗稱其職云王延範者江陵人形貌奇偉任俠好方術荆南高從誨奏署太子舍人後隨繼冲入覲薦為

大理寺丞知秦州累遷司門員外郎歷廣南轉運使初吉州卜者劉昴謂延範當偏霸一方前戎城主簿田辨自言善相亦謂延範大貴即日當乘四門輦一夕與廣州掌務殿直趙延貴等會宿觀天象值太白度經南斗延貴謬曰是所謂火星入南斗天子下殿走者也延範遂與掌市舶陸坦議欲發兵會坦代歸延範寓書左拾遺韋務昇為隱語偵朝廷機事延範奴視僚屬峻刑多怨至是徐休復因懷勇小將張霸告其事馳奏之延範與昴辨坦俱斬廣州市務昇延貴等俱抵罪賜霸錢十萬宰相宋琪等亦坐罷

姚坦字明白濟陰人開寶中以尚書擢第仕州縣遷至著作佐郎太宗詔舉年五十以上通經有文行者備宮僚乃以坦為皇子翊善其後歷考功郎中仍為益王府翊善坦性木強固滯王邸中為假山成召賓僚置酒共觀之坦獨俛首王強使視曰但見血山耳安得假山王驚問故坦曰在田舍時見州縣催科捕入父子兄弟鞭笞流血此假山皆民租稅所為非血山而何是時太宗亦為假山聞而毀之王少佚豫坦即醜詆左右教王托疾不朝上憂之召乳母問狀曰姚坦檢束不得自便故成疾上怒曰欲朕去正人以自便耶王年少必爾輩之

謀因命梓至後苑杖之王薨改衛尉少卿判吏部南曹他日坦因對言及故府諸王之短稱已之敢言既退上謂侍臣曰坦在宮邸不能以正理誨諭事有微失即從而揚之此賣直取名耳後知鄧州移光州卒
論曰古諺有之桃李不言下自成蹊如劉保勳父子誰不哀傷也宋瑄貞白盡瘁何有於家臧丙為友訟寃可以觀交情矣滕中正執憲其失也刻劉蟠持廉其失也詐孔承恭知止其失也惑郭載惠民其失也罔姚坦通經其失也固剛誕之袁廓脩怨之樊知古樂禍之徐休復君子謂不得令終也宜哉

陳從信字思齊永城人

子從吉 王繼升 子昭遠

用事無大小悉委焉累官右知客押衙及即位歷左衛

將軍樞密都承旨征并汾以為大內副部署坐廷美事

以本官罷明年分使三部以從信為度支使加右衛大

將軍卒贈太尉從信好方術有李八百者自言八百歲

從信事之甚謹真傳其術竟無所得又侯莫陳利用者

所為多不法始因從信推薦人以是少之

張平臨朐人嘗事太宗京邸及秦王廷美領貴州復署

為親吏遣去徐帥高繼沖署為鎮將太宗即位召補右

班殿直監市木秦隴上嘉其功遷供奉官監陽平都木

務兼造船場改崇儀副使仍領其務凡九年省八十萬

緡雍熙四年代王明為鹽鐵使聞轉運使李安發其陽

平姦利憂患卒贈右千牛衛上將軍平好史傳聚書數

千卷在彭門日吏有侮平者後悉被罪配京窯務平召

至第為設酒饌勞之曰公等不幸偶罹斯患慎勿以前

為念給以緡錢未幾遇赦得原時人稱其寬厚次子從

吉以蔭至莊宅副使嘗有平賊功云

王繼升冀州人性謹愿事太宗藩邸即位擢至右神武

將軍

王繼升

子昭遠

王繼升

子昭遠

王繼升

子昭遠

軍將軍領本州團練使卒初陳洪進獻地以繼升為泉
州兵馬都監會游洋洞民萬餘叛繼升潛率精騎二百
夜擊破之擒其魁送闕下餘黨悉平後與董儼同掌發
運司號稱職贈洋州觀察使子昭遠

昭遠形質魁偉色黑繼升名之鐵山有膂力善騎射事
太宗晉邸即位補禁衛數遷擢嘗從征太原及范陽咸
有功涪王之遷房陵也諸校以依附被譴獨昭遠無所
預帝以為忠歷殿前都虞候領勤州防禦使命有司治
綾錦院為公署掘地得鐵若山形或言即鐵山故營又
與昭遠幼名同聞者異之帝嘗草書紈扇作古詩賜諸

將意多比諷其賜昭遠尤加賞遇復領沙州觀察使再
為并代副都部署後改靈州護諸州芻粟達靈武李繼
遷不敢犯真宗遷至保靜軍節度使充天雄軍都部署
知府事移知河陽卒贈太尉諡惠和昭遠頗知書性吝
嗇所至無善政云

尹憲晉陽人事太宗藩邸即位擢至供備庫使護夏州
兵殺戮十四族及誘其渠帥屢詔褒美雍熙初詔就知
夏州攻破李繼遷之眾于地斤澤歷四方館使知貝州
移高陽關兵馬鈐轄改知定州與兵馬部署王榮不協
榮素暴歐憲仆地憲快快致疾數日卒

先皇親錄卷之九
王賓許田人善騎射太宗卽位以舊恩補東頭供奉官
亳州監軍賓妻妬悍賓不能制時監軍不許挈家從妻
擅至亳賓具白帝爲召其妻俾衛士碎之杖百以妻忠
靖卒一夕死累遷右羽林軍大將軍判左金吾兼六軍
諸衛儀仗司事淳化四年出知揚州兼淮南發運使徙
爲通許鎮都監卒賓小心謹愿事宣祖太祖太宗始六
十年前後賜資數千萬俱奉釋氏在黎陽日按見古寺
基卽以奉錢脩之掘地丈餘得數石佛及石碣有賓姓
名賓以聞詔名寺爲淳化

安忠洛陽人祖叔于仕晉累任方鎮父延鞏左清道率

府率忠形質魁岸事太宗藩邸始二十年卽位累遷東
上閣門使歷知貝州淳化四年判左金吾街仗復代王
賓爲左龍武軍大將軍忠泣請諸衛將軍列朝外不得
近左右願復舊職上笑曰環列之官古官也大將軍三
品汝終不知朝廷表著之位因從其請復東上閣門使
充淮南諸州兵馬鈐轄卒

論曰太宗踐阼脩給事藩邸功如柴禹錫數輩皆躡登
樞要而陳從信張平王繼升尹憲王賓安忠亦歷武階
膺崇任統之無甚行能徒以謹愿彊幹遭時蒙寵六人
典兵食率號稱職而政府禹錫等不免史氏之譏是故

食浮于人君子所戒云

張鑑 張觀 索湘 宋太初

盧之翰 鄭文寶 王子興 劉綜

許驤 裴莊 牛冕 張適附

樂崇吉 袁逢吉 韓國華 何蒙

慎知禮 子從吉

張鑑字德明以蔭補供奉官鑑本將家能嗜學登進士第歷殿中侍御史太宗命曹彬等討幽州問羣臣方略鑑上疏極言不可論者以鑑燕人沮議非忠也帝置不問與趙延進同掌左藏延進恃恩踰規鑑廷奏之有旨

罷延進以鑑判三司時三部各置憑由催欠鑑請併為一從之用薦為江南轉運使建議割瑞州清江吉州新淦袁州新喻三縣置臨江軍時以為便召還擢至樞密直學士知通政銀臺封駁司又掌三班王繼恩討蜀寇而御軍無政其下恃功暴橫帝以知益州張詠奏命鑑與馮守規偕往安撫鑑與詠協議督繼恩輩分捕殘寇而鑑等招輯反側事平拜左諫議大夫戶部使會五路進兵討西夏命鑑乘傳往環州與李繼隆議護芻糧入靈州及還上疏請棄靈州以息飛輓真宗即位遷至工部侍郎出知廣州居二年民請刻石紀其績後移知朗

宋史新編卷七十九
州溪洞蠻數寇擾鑑以威信諭酋豪皆聽命召還以疾
徙知相州有芝草生監牧之室鑑表其祥異以爲河朔
弭兵款附之兆云

張觀字仲賓毗陵人江南登進士第歸宋舉進士不第
由縣簿歷監察御史充桂陽監使獻所業文賜進士及
策會三司言劔外賦輕太宗命觀按行稍增之觀疏言
斂怨於民留不遣其後復疏言朝廷急務有六曰邊鄙
不寧倉廩未實奢風尚熾逋逃尚多禁令猶密封祀猶
闕願聽斷之暇體貌大臣以之揚摧使沃心造膝極意
論思爲子孫建不拔之業何必較量金穀剖析毫釐以

有限之光陰役無涯之細務哉上稱善召賜緋魚以爲
度支判官歲餘遷左司諫改鹽鐵判官又諫罷治佛寺
不報出爲諸路茶鹽制置副使疏言更茶鹽之制非便
不合旨改知黃州遷揚州皆有善政召爲三司河東道
判官有詔計司官屬不得越局言他事觀自以任諫官
乃上書指陳拾遺補闕之職不奉詔上怒出知道州移
廣南西路轉運使坐奏事不實被劾獄未具卒觀廣覽
漢史雅好論事辭理切直有古人風焉
索湘字巨川滄州人開寶六年進士釋褐鄆州司理叅
軍太宗時歷監察御史詔下東封與劉蟠同知秦山路

轉運事又爲河北轉運副使以能幹聞端拱中自鹽鐵判官復爲河北轉運使遷至虞部郎中選爲將作少監有訟其擅易運絲以自用者降秩知相州時有羣盜聚西山下謀斷澶州河橋入攻磁相州相擇精銳三百人偵其入境掩擊盡擒之事聞詔復舊官真宗卽位入爲右諫議大夫復充河北轉運使閻日新建議於靜戎威虜兩軍置場鬻茶以資軍用相言非便遂止又言事者請許權場商旅販易於北界北界商旅許於雄霸州市易資其懋遷庶息邊患詔相詳議相言邊民易動難安蕃戎之情宜爲羈制望且仍舊爲便入爲戶部使坐與

王扶交相請託擅易版籍責授將作少監後出知許州徙荆南復爲右諫議大夫知廣州卒

宋太初字永初晉城人太平興國初舉進士解褐大理評事通判戎州歷太常丞通判成都府會詔求直言著守成箴以獻遷至兵部員外郎充鹽鐵副使時陳恕爲使太初有所規畫必咨恕未嘗自用爲功恕甚德之會西部有警轉饋艱急改刑部郎中充陝西轉運使坐副使盧之翰違旨貶官明年起祠部郎中知梓州俄復舊秩真宗咸平初拜右諫議大夫知江陵府蠻寇擾動太初以便宜制遏詔獎之歷權御史中丞先是按劾有罪

宋史新編卷三十九
必豫請朝旨太初以為失風憲體獄成然後聞上時論
肆之俄出知杭州以疾求近地得廬州疾久頗昏忘不
能治大郡連徙汝光二州卒太初性周慎所至有幹職
譽嘗著簡譚三十八篇序曰禮之中庸伯陽之自然釋
氏之無為其歸一也

盧之翰字維周邠州人少篤學登進士第歷吏部員外
郎陝西轉運使西川安撫轉運使之翰嘗薦李憲為大
理丞憲坐賊抵死又副使鄭文寶得罪之翰併前愆左
授國子博士領使如故尋復舊職會調發芻糧輸靈州
詔分三道護送命洛苑使白守榮馬紹忠領其事之翰

違旨擅併為二為李繼遷邀擊大失輜重坐除名貶許
州司馬復起省郎為陝西轉運使召拜禮部郎中賜金
紫復遣之任咸平元年為京西轉運使坐橫議非便黜
知歸州三年授廣南西路轉運使就改太常少卿知州
事之翰無廉稱又與轉運使凌策不協陰發其事徙知
永州未行卒

鄭文寶字仲賢太平興國八年登進士第歷殿中丞使
川陝均稅次渝涪聞夔州廣武卒謀亂乃乘舸泛江一
夕數百里以計平之授陝西轉運副使許便宜從事會
歲歉活飢民八萬口既而李順亂蜀秦隴賊趙包聚徒

宋史新編卷之九
數千將趨劔閣附之文寶移書蜀郡分兵討襲獲其渠
魁餘黨殲焉遷太常博士加工部員外郎先是諸羌部
落樹藝殊少但用池鹽與邊民交易穀麥會餽輓趨靈
州爲繼遷所鈔文寶建議鹽禁許商人販安邑解縣兩
池鹽於陝西以濟民食官獲其利而戎益困繼遷可不
戰而屈乃詔自陝以西私市者皆抵死行之數月戎人
乏食相率寇邊內屬萬餘帳亦叛商人多取他逕出也
鄧襄汝間邀善價關隴民無鹽以食境上騷擾上知之
除其禁朝廷議城古威州訪于文寶文寶言威州在清
遠軍西北八十里東控五原北固峽口足以襟帶西涼

咽喉靈武城之便且請先建伯魚青岡清遠三城爲頓
師歸重之地徐議營田積粟實邊以爲經營安西綏復
河湟之漸詔從其議文寶至賀蘭山下見唐室營田舊
制建議興復可減歲運之費清遠素無冰泉文寶發民
負冰數百里外留屯數千人又募民以榆槐雜樹至者
厚給其直地曷鹵樹皆立枯西民甚苦其役而城成不
能守卒爲山水所壞又令寧慶州爲水磴亦爲山水漂
去旣而文寶復請禁鹽邊民冒法抵罪者甚衆又奏減
解州鹽價未滿歲虧課二十萬貫下詔切責貶藍山令
真宗咸平中召授殿中丞掌京南榷貨時慶州發兵護

芻糧詣靈州文寶素知山川險易上言必爲繼遷所敗未幾果如其奏轉運使陳緯沒於賊繼遷進陷清遠軍文寶時丁內艱服未闋卽命相府召詢其策略文寶因獻河西隴右圖敘其地利本末且言靈州可棄時方遣大將王超援靈武卽復文寶工部員外郎爲隨軍轉運使至環州或言靈州已陷文寶乃易服單騎冒雪間道抵清遠故城盡得其實遂奏班師就除本路轉運使疏請再葺清遠軍都部署王漢忠言其生事遂徙河東上言管內廣銳兵萬餘難得資糧請徙置近南諸州又欲令強壯戶市馬備征役宰相李沆等以爲非便文寶固

執前議因命錢若水詳度所對與沆等同遂罷之遷刑部員外郎賜金紫寇準薦其熟西事復任陝西轉運使上出手劄密戒邊事與僚屬計議勿得過有須索重擾于下後有言其張皇者詔徙京西景德元年契丹犯邊又徙河東文寶安輯所部募鄉兵張邊備又領蕃漢兵赴河北手詔褒諭未幾復涖京西契丹請和文寶陳經久之策上嘉之三年召還未至遇疾擢其子於陵爲大理寺丞知襄城縣以便養後改兵部員外郎歸襄城別墅卒文寶好談方略以功名爲已任父在西邊參預兵計心有餘而識不足又不護細行所延薦屬吏至多未

嘗擇也能為詩善篆書工鼓琴有集二十卷又撰談苑二十卷江表志三卷
王子興字希孟密州莒人太平興國八年舉進士解褐北海主簿歷任江淮兩浙制置茶鹽遷至太常博士真宗即位遷殿中侍御史因入對與三司論列利害以子興為長轉度支員外郎子興以每事上計司移報稽滯求兼省職乃命為鹽鐵判官仍領制置增歲課五十餘萬貫咸平三年就命兼充淮南轉運使子興精吏事父掌茶鹽漕運裁量經制公私便之文牒紛委曾無凝滯明年表求代詔許自擇子興以下袞劉師道名聞即命

袞與師道為轉運使子興拜右諫議大夫戶部使卒
劉綜字居正虞鄉人少依外兄通遠軍使董遵誨遵誨嘗遣貢馬太祖嘉其敏辨將授三班之職綜自陳素習詞業願應科舉雍熙二年登進士第解褐邛州軍事推官歷知建安軍遷太常丞咸平初判三司都理欠憑由司出為河北轉運副使夏人擾西邊環慶大屯士馬詔徙綜陝西轉運副使轉太常博士時靈州孤危獻言者或請棄之綜上言靈州民淳土沃為西陲巨屏所宜固守以為扞蔽然後於浦洛河建軍城屯兵積糧為之應援此暫勞永佚之勢也俄充轉運使四年又獻議於鎮

宋史新編卷之七十九
戎軍置屯田務又錄唐安國鎮制置城壕鎮戎古記石
本以進詔從其請累遷起居舍人再為河北轉運使時
兩河用兵邊事煩急轉漕之任尤所倚辦綜繼領其職
號為詳練至是眷矚甚厚警急之際輒資其奏處景德
三年召拜戶部員外郎樞密直學士勾當三班院四年
擢知孟州事未幾召還復出知并州以政績聞州民乞
留優詔嘉獎歸朝知審官院改吏禮二部郎中充職兼
知通進銀臺封駁司大中祥符中館伴契丹使因作大
雪歌以獻俄權知開封府以未疾命知廬州授右諫議
大夫卒綜強敏有吏材所至抑挫豪右振舉文法然尚

氣好勝不為物論所許

卞袞字垂象成都人父震工為詩舉蜀進士渝州刺史
南光海辟為判官蜀平仍舊職會賊杜承褒率眾圍城
震中流矢州兵宵遁賊遂入據城以偽官厚賄誘震震
斬其使伏兵擊其黨類與刺史陳文襲分部餘卒夾攻
之賊遂平震以功得贖以虢州錄事參軍卒袞太宗時
登進士第累遷著作佐郎通判宣州淳化中上命采庶
僚中廉幹者旌異之袞預焉歷刑部員外郎充鹽鐵副
使卒袞明敏有吏幹然性培克嚴峻專事捶楚至有大
蟲之號真宗嘗謂近臣曰大凡督察部下糺逖愆違非

有大故所宜矜恕官吏自當畏威懷惠不敢貳過公家之事亦無不濟乃知為吏之方適中為善也

許驤字允升世家薊州當後唐之季父唐白其父信曰國政廢弛必棄釁不即去且為所虜信以資產富殖不樂他徙唐遂潛齎百金而南未幾晉祖革命果以燕薊賂契丹唐歸路遂絕卜居睢陽娶李氏女生驤風骨秀異郡人戚同文以經術聚徒唐攜驤詣門下從學驤十三能屬文善詞賦唐不識字而釁家產為驤文當時秀彥太平興國初詣貢部與呂蒙正齊名太宗雅知之廷試擢甲科歷官右補闕出知諸州及諸路轉運使歸

知審官院積遷至御史中丞真宗即位改工部侍郎屢求小郡養疾命知單州卒年五十七贈工部尚書驤無他才略人稱為儒厚長者

裴莊字端已閬中人蜀明經登第歸宋歷高陵主簿本府召權司理掾轉運使雷德驤以威望自任嘗巡按至境官屬皆出迎候莊獨視事本局徐謁道周德驤稱其有守歷通判澶州遷太子中允端拱初潘美鎮真定又辟為通判時契丹掠趙深邊將無功莊上書以為周世宗誅樊愛能何徽二將遂取淮南克巴蜀願陛下申明紀律無使玩寇淳化三年召訪邊事稱旨拜監察御史

宋史新編卷之九
三司鹽鐵判官上疏請給兩省官諫紙會劉式建議請
廢緣江榷務莊力言其非便累遷祠部郎中真宗卽位
遷度支歷河北轉運使時傅潛統大軍駐定州北莊屢
條奏其乏謀略恐失機會王顯掌樞密顯與潛俱起攀
附頗庇之莊奏至多不報徙知越州俄傅潛得罪莊因
上言顯潛皆非材致誤邊事請行嚴誅以肅羣議未幾
徙知宣州會詔百辟上對直言莊條列四事改司封郎
中遷至光祿卿卒年八十一莊有吏幹好爲規畫慷慨
敢言太宗獎其忠讜多聽納然無清操寡學術嘗建議
置廣聽院西垣學士聞者嗤之晚年退居製棺槨自隨

喜接賓客終日無倦子奐咸平二年進士
牛冕字君儀彭城人太平興國三年進士歷左正言福
建轉運使加左司諫建議廢邵武軍歸化金坑土人便
之至道初連拜兼侍御史知雜事真宗時選知益州擢
至右諫議大夫兩川戍卒乘符昭壽之虐嘯集爲亂冕
與轉運使張適委城遁坐削籍流遠州歷海鄂二州別
駕淮南節度副使後帝頗念之起知漣水軍俄復祠部
員外郎卒張適者太平興國五年進士任藩郡有治績
以廉敏稱爲水部員外郎知鄜州獲對太宗喜其詞氣
俊邁賜緋魚旋改京東轉運副使加直集賢院一日三

被寵渥時人榮之徙西川轉運使坐貶起爲彰信軍節
度副使知淮陽軍卒
樂崇吉字世昌封丘人少爲吏部令史上書言事調補
臨淄主簿會令坐贓敗卽命崇吉代之復以書判優等
改舒州團練判官未行留爲中書刑房堂後官明習文
法清白勤事累擢江南轉運使歷知洪州濠州遷至衛
尉少卿以將作監致仕卒

袁逢吉字延之鄆陵人開寶八年擢三傳第釋褐清江
尉歷西京轉運使遷至水部郎中宰相呂蒙正薦其有
經術宜任學官會蜀叛方藉吏資授西川轉運使徙荆

湖北路坐乏糧餉罷職知夔州會遣使川陝採訪因條
上知州通判有治迹者七人逢吉預焉太宗賜詔褒諭
歷知汝州至鴻臚少卿卒逢吉性脩謹練達時務初鄆
州牧馬草地侵民田數百頃牒訴連上凡五遣使按視
不決逢吉受命往悉還所侵田民咸德之

韓國華字光弼安陽人太平興國二年進士歷監察御
史雍熙中假太常少卿使高麗時太宗將北征以高麗
接遼境屢爲其所侵命齎詔諭之且令發兵西會旣至
其俗頗獷鶩恃險未卽奉詔國華移檄諭以朝廷威德
宜亟守臣節否則天兵東下無以逃責於是俯伏聽命

宋史新編卷七十九
累遷左司諫充鹽鐵判官淳化二年朝廷疑契丹請和
非實遣國華使河朔察之既至盡得其詐以聞每歲後
苑賞花三館學士皆得預國華與潘太初因對自言任
兩省清官兼計司職不得待曲宴願兼館職卽命竝直
昭文館前此未有也累官太常少卿知泉州遷右諫議
大夫卒國華偉儀觀性純直有時譽子琚璩琦竝進士
及第琦自有傳

何蒙字叔昭洪州人李煜時舉進士不第獻書言事署
錄事參軍入宋歷遂寧令太宗征契丹還作詩以獻召
見賞歎授右贊善大夫三遷至水部員外郎通判廬州

戶部使上其治狀詔賚緡錢稍遷司門巡撫使薦其材
敏召對訪江淮茶法條奏利害稱旨賜緡魚及錢十萬
後二日復對又上淮南酒權便宜特改庫部後賜錢二
十萬因命至淮右提總其事自是歲有羨利使還知溫
州坐失舉削一官真宗卽位復前資出知梧州改水部
郎中上所著兵機要類十卷累轉庫部加太府少卿歷
知濠州上表謝事授光祿少卿致仕卒

慎知禮衢州人父溫其有詞學仕錢俶終元帥府判官
知禮爲掌書記宋初介俶子惟濟入覲歸署營田副使
後從俶歸朝授鴻臚卿歷知陳州興元府母年八十餘

居宛丘懇求歸養退處十年縉紳稱其孝母服除表請
納祿以工部侍郎致仕卒知禮自幼至老歲讀五經周
而後止每開卷必正衣冠危坐子從吉

從吉字慶之錢俶壻也爲元帥府長史歸宋歷右庶子
遷詹事自歸朝居散秩幾三十年頗以文酒自娛景德
初上言求領事務判刑部頗留意法律條上便宜後改
官糾察在京刑獄又判吏部銓又權知開封府擢至給
事中真宗召戒之曰京府浩穰太速則誤太緩則滯惟
須酌中耳從吉不受請屬才數月有咸平縣民張斌妻
盧氏訴姪質詬悖質賄于吏從吉子大理寺丞銳爲請

于縣宰質洎盧迭爲訟縣聞於府從吉命戶曹參軍呂
楷推問盧之從叔號略尉昭一賂楷楷又不決盧兄文
質又賂從吉長子大理寺丞鈎鈎白從吉而隱其所受
盧詣府列訴卽下其事右軍巡院昭一兄澄嘗以手書
達錢惟演云寄語從吉事逮鈎銳請緩之從吉密請付
御史臺鞠之獄成從吉坐勒停惟演罷翰林學士楷鈎
免官配隸衡郢州銳文質皆削一官澄昭一並決杖配
隸又高濤者景德中舉進士頗恃姻援驕縱知大康縣
民有詣府訴家產者清納其賄時已罷任卽逃居他所
銳嘗就清貸白金七十兩清以賄賂將賅求以爲助時

方鞠盧氏欲從吉請對發其事欲以自解清杖脊黥面配沙門島銳與從吉再削官從吉後起衛尉卿判登聞鼓院以光祿卿致仕卒從吉喜為詩時有警語兼工醫術子孫第進士升朝曳朱紱者數人家故富猶嗜財治生至鬻棺櫬於市人咸鄙之又善為饌具分遺權要晚年進趨彌篤故取敗云

論曰裨身之謂行應務之謂才中人兼者鮮矣長厚莫如許驥純直莫如韓國華勤潔莫如樂崇吉篤孝勇退莫如慎知禮其行無議已撫輯莫如張鑑建白莫如張觀幹敏莫如宋太初王子興練達莫如索相何蒙袁逢吉其才莫尚已鄭文寶有志而寡識劉綜舉職而尚氣下衮奉法而少恩裴莊敢言而不學斯各有所短也若盧之翰乏廉操牛冕棄城守才又何稱焉

宋史新編卷七十九

宋史新編卷七十九

宋史新編卷七十九

天保三

